

# NAKILOLOGIAENA

## Naña Yoane Pisuia

## Ana Siriyuia

## Visayuena Na Tusi Nene

*Sunienas plas na tusi nini*

E tusi nini, Yoani siriyu suri la naña Yesu Kristo kila meraravan pania. Tusi nene, kiena kia na plas “Nakilologiaena”.

Yoane siri tusi nini e pogos naña le Rom lala akila suri m̄arera manene la papisi pa li naleлагаena lala, a asumña amem̄om̄ari la ke amarmare, komin naña amlelaga e Yesu Kristo. Yoane siri m̄aki nini vena visirplanen sitomienia kiena la nene, vena asum̄alu m̄arera e pogos m̄arera lala.

E tusi nini, tekilia teulo suri la naña sane m̄enienia naña Yesu kila meraravan pa Yoane, naga pisayu totou na suri lala vena li naleлагаena la e pogos nene akilia alogekilalea kana kinasa. Ana yaru tañena lala tañatete akilia kana kinasa. Sitomien kiena totou lala na tusi nene sanini. Yesu Kristo, naga pe Ntewa namava, a pe kieta Suñe, a e limana, Ntewa yoko kila kare make nena Yermare amio nasinekar tañena lala. Pogos naña kila make yum̄aena nene, yoko naga la nalaena kiena yaru la naña asum̄alu m̄arera e kiela lelagaena lala. Yoko were la ava asike amio naga mae peni viu a e yomarava viu naña naga kila ruru make rui.

*Kom̄pasnen tusi la na nini*  
 Visena ūesa 1:1-8  
 Suri ūesa naña Yoane m̄enia pisuia, ana lum̄aki  
     lala pae sum̄are olua 1:9—3:11  
 Tusi naña ve yaru vike re, naña suri la olua  
     sike ea 4:1—8:1  
 Kumasua olua 8:1—11:19  
 Alkita amio suri mali lua naña la apiowa pañisi  
     12:1—13:18  
 Suri na m̄enienan tañena la naña Yoane pisuia  
     14:1—15:8  
 Pialora olua naña apulen sinemimienan kiena  
     Ntewa 16:1-21  
 Ntewa kila kare pulkumali naña Papilon a  
     taulu surmali naña piowa, amio navisalu-  
     aena kokani, amio Yermare 17:1—20:10  
 Ntewa la nakoena va yaru lala e legienan maro  
     20:11-15  
 Peni viu amio yomarava viu, a Yerusalem viu  
     21:1—22:5  
 Visena maro 22:6-21

*Navisa meraravanen tus nini*

<sup>1</sup> Tus nini naga nakilogiaena na sur ya la naña yoko aim amaliv e legienan la naña pimi ke na wa. Ntewa sinenan yar la naña amiyumnae kiena ke e yomarava la monar akilia ruru sur la nini, ana naga mla nakiliaena la nene pa Yesu Kristo, yoko Yesu pitetalia kiena navisi tai pimi m̄alivin kiena yar na yumnaena naña Yoane, kila sur la nene pimi ūarpoyo e kiena m̄enien tai. <sup>2</sup> Yoane tol m̄enienan nene, ana pisu kilale sape nanene visena kiena ne Ntewa pe lelaga, pe visena lelaga nena naña navisa

meraravanen ya naña yoko Yesu Kristo yumāen sirau, kila narui siriwal ruru make sur naña naga pisuia, vena nasirau takilia taulioa.

<sup>3</sup> Ana yoko yar a naña wolo visena na visawalen la nene, pona yagogonia, ligān ruru teke e sinena, yoko na visaruruena kienā ne Ntewa ve keviu e kienā malena, komīn naña pogos na legienā keviu nene pimi ke lavis manene laa narui.

*Yoane siar visawalen kienā mēniena e visen tai nayeluaren Ntewa*

<sup>4</sup> In na Yoane, nesiri plan visena la nini imāsu van amiu pegas na lelagaena la olua naña asike e pulkumali lala e pupia lepas naña tepio tesape Esia. Nekekaran naña nevitawe amiu e kia kien naga naña sike na konua rui, sike nanagane, a yoko sike sike lue. Nemlen wo amiu ke nesape pupia lemamienā a sumāre sike e kiamiu malena la silaga, naña yoko tol amiu imi kome kieta Ntewa nene amio kienā ninuna olua naña asmāl asike yamon kienā lele wa na totanoena. <sup>5</sup> A kilia imi mēna kome Yesu Kristo, naña naga masisu mā pano kana kuruta mlau, siraunia naga pēs naña mal si petan marena, naña nagane naga pe pārin supe kienā ne pārin supe na yomarava lala.

Ee, Yesu Kristo ke nanene narui naña naga sinen sii ita pañisi pano-o tamān kana kuruta mlau vena ul plan ita vetan koaena na kieta mlamulen viowa lala, <sup>6</sup> ana naga pisirlua ita teim teve mratava ve taaga na lus kienā ne kienā

narin suþe lala, a naga mligan plan ita vena teiila naga sa naþa tepe yar wa na yumñaena kiena ne arimana, nane Ntewa na mavä.

Yesu na kila po pan ita sanene wa, ana popon teyeluar kiena kia, tevisirlua naga va manene laa metava, vano vano-o ve ðisi re pogos tai, sanene.

**7** Avisu ruruia! Naga ke narui naþa sunña kupanpo lul la metava mälivin sape vitom tano! Yoko ita make ga kilamarata visuia, ore, amio mñena la naþa asuar naga e lak torovia, la mñena yoko avisu kilale si naga. Ana yoko pupia sineyeena a tagena molue e yeririna na yomarava lala pogos naþa asitomñal si e ya naþa la akila pan nanua sumo. Yoko ve sa ke nene narui, nevisa “sanene” ea.

**8** Popon tevatanon Suþe Ntewa, Ntewa na märeraena nae meta manenea, naga naþa sike kemua rui, sike nagane, a yoko sike sike lue, naþa kiena visena urmi tai pisa sanini, sape “In na nepe purþesa, in na neve luasa.”

### *Yoane pisu totou na Yesu*

**9** Kam erau make lala, in Yoane in na nepe wenla amiu, naþa nevisawal sur make van amiu. Nesape nevisawal van amiu komin naþa ita ke narui naþa tepe kiena ne Yesu, ita ke narui naþa tesike vatanon kiena nasuþenena, ita ke narui naþa tesumña topär pae ke nalogeen viowa na pog märera nene, a ita ke narui naþa tesumña takawean ita ke temio sitomena napiayavi.

Pogaga, kiau sunena va sanini, sane nanua sumo, nesumña nepisawal ke visen kienā ne Nnewa, nemlologon mā Yesu Kristo pano-o, le Rom la amla nakoaena pan inu, amligan inu nepim nemiyumāe korena e narin purvanua nini, kien kia Patmos. <sup>10</sup> Ana e Legiena Wa tai, nesumña sane nemloge sane Ninuna pimi e inu, nemloge pulgo tai varaun inu, pulgon keviu sane kumasua mielu, pisa sanini sape

<sup>11</sup> “Ya ne yoko ovisu ne,  
ovisua osirilua va e tus tai,  
yoko oligan va teliliv viora e sumāre punu ga na  
lepas nae Esia,  
vena akilia auloia.

Sumāre la nene, la olua, nane Episas, Sumāna,  
Pekamām, Taeatara, Satis, Pilatelpia, a  
Laotisia.”

<sup>12</sup> Pulgo nene sumā pis pan inu sanene, ana sineun nesape nevisu ane sanene, noñarpu inu sane nepisu lan kantel ga la sike na, la olua nañā amiyumāen e kol. <sup>13</sup> Lan kantel la asmāl ga asike sanene, ana yoko nomāl yar tai sumāl sike likan la, nañā naga sanena nañā asape Narina ne Yeririna. Naga miyen kulsota piavi tai, amio kulmrae tai nañā amiyumāen e kol, atelan ñaro e yerena. <sup>14</sup> Vilñparina, miyuwowo na miyuwowo manene laa, a kilamarana tego sane kap nañā mluamene. <sup>15</sup> Lana mñarera ruru po, sane pototo nañā mñarera ruru po, pilavila, a pogos nañā naga pis, pulgona mñaaga sane sii nañā ñpanpo e piame.

<sup>16</sup> Naga sumālar sumā ga sa nañā e limana marua, mlarar ke verue olua, a playu na mara nañā mal na mal e lepas luwoka molue ke kome

logona. Marana m̄ena ga, suwala, miyuwowo na miyuwowo, sa naña mrae tego m̄arera kolpae.

<sup>17</sup> Nepisu sanene, lelaga, kila narui nemare nenaga, nemlor nena e mialana. Ana kian limana marua pimi tol inu, pisape “Ve omarau re, in naña nepe nasiarena a nepe naluaasa.

<sup>18</sup> Naga naña pe purþes nen malena, inu, komin nemali, þisna nemare, þisna nemal sina, ana nemal lue narui.

In ke narui naña ki namarena amio ki na pulukapi viowa kiena ne yar na marena lala sike e lumñau.

<sup>19</sup> Ana marauen toko, osiri plan ga ya naña opisu ke ne, naña lepas nanagane, þarar lepas naña na legienla naña pimi ke na wa.

<sup>20</sup> A nevisa sur ta van ko sumo wa, e lepas na verue olua naña opisu e lumñau, amio purþes nen kantel olua naña amiyumñaen e kol. Sur la nene sane kiliaen tai naña tapolou, ana kala kinasa sanini, verue olua nene, naga navisi la olua vena visuaren sumñare la olua.”

## 2

### *Lumñaki na sumñare olua*

<sup>1</sup> Ana Yesu pisa ke sina pan inu, sape “Nagane yoko nevisawal ya naña okilia osiri va vininua sumñare olua nañpani.”

*Mak nasumo, naga va e sumñare nae Episas, naga sumñare naña pe sinesiiena su re e poli*

“Osiri ūpesan māk va van navisi na sumāre na pulkumali naña Episas, osiri sanini, ovisave Visena nene pimi pan amiu pimi kome naga naña mlarar ke verue olua e limana marua, sumā mialoro teteliv ke likan miasin kantel la olua nañpani.

<sup>2</sup> “ ‘Naga pisawal pan amiu sanini, sape, “In na nepisu kilale amiu rui. Nepisu kiamiu yumāena wo lala, nepisu naña apio papisi, nepisu naña amāreran amiu amio kiamiu sitomena viayavi lala po pañisi. Nepisu mēna po pañisi sa naña pe atamān re yar viowa la apim akila kare amiu poli, komin naña lañas, pog naña apim amālivin amiu, apisape la ape li na lologena, ana sa naña kam na akilali la, a apisuveve ruru la, ana akirawal rui sane apisokan ga. <sup>3</sup> Komin ga kiau kia naña amla ke rui, kam na apane pog mārera lala, a la akila kare amiu, ana nekililia rui kam na pe amligan re poli wa, kam na apuarar ke mārera wa, a sitomen naña kam na asape sinemiu male pañisi, pona amloge sa naña toroki, nanene naga pe to re nena e amiu poli.

<sup>4</sup> “ ‘Kiamiu ūpelaga la nene na po pañisi, ana lelaga, sur tai teke naña kam na asumā akila ke ne naña in na pe nekekaran re nena ga, a nanene na popon nevisawal mesmesun nena van amiu. Naga sanini, naña sane pupia sinesiiena naña topesan e amiu, nagane pito laa tano, pe sa re si nanua poli. <sup>5</sup> Akilali naña sinemiu wasuþe si e pupia ūpelaga na sinesiiena wo nanua ne, naña sinemiu sii inu pañisi, a sinemiu siisii amiu amio yar tañena lala. E pogos nene na po na po, ana nagane na, pito tano na pito tano. Ana pogaga,

monar avilon amiu ga, a monar awasuþe amiu e yo wo naþa asu þes e sumo. Ana visae ve avilopu amiu re, nekilia nesape yoko neim nomalivin amiu, neurelua purþes nen kap vivaga naþa sumal sike ne pivaga ke likan amiu nagane.

<sup>6</sup> “ ‘ “Lelaga, naga nene naga kiamiu pupia napiowaena tai ne nepisa ga pan amiu na wa, ana sineun nesape nevisawal mæna van amiu sane kam na akila mæna pupia sur wo tai, naþa nekekaran papisi. Nane naþa kam na asumæ akawe amiu ke amio la naþa akila ke sur nawowe tapena lala, naþa yar naþa Nikolaita mlologon þesania. Apiowa ga, in mæna ga yepmavin nenaga.

<sup>7</sup> “ ‘ “Yar naþa kiligan teke ea, popon loge kilale ya naþa Ninuna ne Ntewa pisawal ke pa þegas nen li na lelagaena lala. Yar naþa sumal mærera sumæ vano-o taulu naviosaena, yoko netamæn vania vena kilia va su nena loyumæ likan lokove nowo kana ne Ntewa, va kan mrasnen lak na malena.” ”

*Mak na lua, naga pa e sumare nae Sumana,  
naga sumare naþa yar la sinela karia*

<sup>8</sup> “Monar osiri mæk va va naþivi na sumare na pulkumali naþa Sumana, ovisa sanini, ovisave Visena naþa pimi pan amiu, pimi kome naga naþa naga þesa a naga maro, naþa amemær mare, ana siraunia mal sina.

<sup>9</sup> “ ‘Naga visawal van amiu sanini, sape “In na nekilia ruru pog mærera la naþa kam na apisuia, a nekilia nesape limamiu koren ga. A monar

akilia naña pe limamiu koren re poli, ana ape yar na sur moki pañisi! Ee, nekilia sane la naña asape la ape le Yu, akuan ke visen viowa mok liu pan amiu, ana ve asitom re, pe nepisu re nena nesape la ape kiau le Yu la poli, peraga, la na ape yar na taveveen nena Yermare.<sup>10</sup> A pe lelaga, pona ve ve piavi re kam lañasa monar awar pupia naloge viowaena la yo, komin naña amlelaga e inu, ana ve amarau re. Pona Yermare kilia kila naña yoko akoven amiu lañas ava e yumña nakoaena yo, vena kilali amiu, ana nekilia nevisave naga yoko kila kare amiu vano tol ga legiena ve lualima. Visae sanene, monar asumal mñarera vano-o tol naña alalua kiamiu yalua, ana visae ve alor re e pogos nene, yoko pogos naña aim amalivin inu, yoko nela pupia nalaena van amiu, nane karo nañarila namaliena naña pe kol.

<sup>11</sup> “ “Yar naña kiligan teke ea, popon naga loge kilale ya naña Ninuna ne Ntewa sumña pisawal ke pa li na lelagaena lala. Yar naña taulu ñelaga viowa na malena nene, yoko naga ve va warpo re yo e marena na lua naña yoko imi sirau.” ,”

*Mak na telu, naga pa e sumare nae Pekamäm, naga sumare naña tamän navianena viowa tapena lala apim loyumña*

<sup>12</sup> “Yam si tai, monar osiri mäk va va navisi na sumare na pulkumali nene Pekamäm, ovisa sanini, ovisave ‘Visena naña pimi pan amiu ne, pimi kome naga naña ñarar ke playu na mara naña mal ga lepas luwoka.

**13** “ ‘Naga pisawal pan amiu sanini, sape “Nekilia ruru sane e naña kam asike e ne, naga lepas tai naña likan nena yo naña Yermare pe suñenia! Naga lelena lala sike ga ko pun amiu ne, ana kam na apuarar ke kiau kia na po pañisi. Nanua loyuma e kiamiu pulkumali nene, pona tevisa tevisave pulkumali kiena Yermare, la amemar kiamiu puruvi naña Antipas, ana la amarareran asape kam na monar alupar kiamiu lelagaena e inu. Ana peraga, sa naña naga piawa mā mārera e inu pano tol marena, kam mēna ga yar tai pe purmatan inu re poli.

**14** “ ‘ “Naga nene naga lepas napo ne, ana sur lañasa naña sineun nesape nevisa mēna van amiu. Sur ñesa, loyuma e kiamiu ñegasa, yeririna lañasa asumā naña ataveve ke sitomena lañasa sa ke ga Navisawalena Pelamā nanua. Visae asitomāl mīga, naga ke narui naña pisayu mrapa lañasa pa Pelaka, ana pe piavi re poli Pelaka towea mlavia pa pisayu pa le Israel lala, kila sanene pe piavi re poli, la asumā akan kinanena wa la naña yeririna tañena la akila kuñapāena ea pa kiela nono lala, a la asumā akila lue ga kolau lala. Akila ke mlamulen piowa la ne sanene, ana taveve visena naña amloge ne, la asitom asape pogaga.

**15** “ ‘ “A kana na lua nena, lañas si naña kam na atanān la asike likan kiamiu li na lelagaena lala. Naga nene la naña asumā ataveve ke navianena na wowe tañena la nene, naña yar nene Nikolaita naga mlologon ñesania.

**16** “ ‘ “Visae ve sa nene, kam na monar avilopu

kiamiu sitomen vetan naviowaena la nene! Visae peraga, yoko ve ve piavi re neim nakate pun amiu, a yoko visen la naña nevisa e gou van la e pogos nene, yoko ve sa playu na mara naña te kinekinela, kilapel la vapisi.

<sup>17</sup> “ ‘Yar naña kiligan teke ea, popon naga loge kilale ya naña Ninuna ne Ntewa pisawal ke pa ñegas nen li na lelagaena lala. Naga naña taulu napiowaena, yoko naga la kiena nalaena wo tai. Yoko nela kinanena tai vania, kinanena nena sa naña le Yu la akan e yokorena, ana naga nene na pe kinanena tai naña pe yar pisu re poli wa. A yoko nela kilavaru yuwowo tai vania, naña ate kia viu tai sike ea, naña naga naña waria, naga ga yoko kilia ruru kana kinasa.” ’’

*Mak na vari, naga pa e sumare nae Taeatara, naga sumare naña tamān ga ñelaga piowa sumā loyumā ea*

<sup>18</sup> “Pogos si tai, monar osiri māk va va navisi na sumare na pulkumali nene Taeatara, ovisa sanini, ovisave ‘Visena na pimi pan amiu pimi kome Narina ne Yeririna, naña kilamarana pila a pivaga sane purmenen kapi, a lana mārerera sane pototo. <sup>19</sup> Naga pisawal pan amiu sanini, sape “In na nekilia ruru kiamiu yumāena lala, a kiamiu sinesiiena lala amio kiamiu naviawaena, kiamiu yumāena mārerera a sitomena la naña piayavi, a metavania nekilia nesape nagane kam na akila pa laa narui, taulu naña akila ñesania.

<sup>20</sup> “ ‘Naga nene naga kana lepas napo ne, ana sur si tai monar nevisa meraravan van amiu.

Nanene e lepas na sira viowa nene, Sesepel, naña apisu kilale kienā napiowaena lala, ana atamān ga kila mā wowe e sur viowa la naña kilakila ke ne. Naga sape naga pe sira tai naña pe navisawalena, a pona kam na amlelaga e naga yo, ana naga pisokan ga ne. E kienā navianena lala, naga sumā pere yar na kiau yumāena la apa ape tañena la narui, naña nagane asike e ñelaga na mlamulena na kolauenā rui, a asumā akan ke kinanena kana nono lala, a la asitom asape ñelaga la nene na pogaga ne. <sup>21</sup> In na nemla pulmas pania vena sitom ruru sina, vilon naga vetan kororak la nene, ana naga yepen mavin ga.

<sup>22</sup> “ “Pogaga, kiau sitomena teke rui sane yoko nekila naga mēne tog tai na maiena mārera lala, a yoko nekila yar la naña akila kolau amio sira nene, visae ve avilon la re e kiela mlamulena viowa lala, yoko la mēna aloge viowa vapisi na vapisi. <sup>23</sup> Sira nene, yoko tañatete narina mali, yoko sineu kar la make ga. Ana pogos naña la na ñegas nen li na lelagaena la avisu sur nene, yoko avisu kilale sane in ke narui, kiau navisuveveena telivi pano tol ya naña teke e sinen yaru, a kilia lual ya naña teke e kienā sitomena. A yoko avisu kilale mēna sane in ke narui nesumā nekila maran ke pa yar lala torokin ga ñelaga na sur la naña akila ke e kiela malena lala.

<sup>24</sup> “ “Ana e lepas na pun amiu kam yar tañena lala nae Taeatara, nekilia nesape kam na pe ataveve re navianena kienā ne sira nene poli. Naga kilali naña koven visen kiki la pan amiu, sane yoko naga vike sitomena urmi la naña

tapolou van amiu, ana kam na apisu kilale naña Yermare ga naga pe purp̄esnen visena la nene. Yoko ve nevisa re si sur tañena van amiu,<sup>25</sup> ana nevisa ga sane kam na auarar ga visena lelaga la nene m̄arera naña kam na atol rui, ve aligan re, auarar la m̄a vano-o neim si na.

<sup>26</sup> ““Naga naña taulu na viowaena, kila ga taveve ya naña sineunia vano-o tol luas nen pogos nini, yoko nela pupia nalaena vania. Yoko netam̄an vania naga ve sup̄en purvanua lala,<sup>27</sup> sa ga naña Tus na Yawena la pisayuia, naña sape

*Naga yoko ve sup̄en yeririna lala naña laki naña  
mlarar ke e limana, naga pe pototo m̄arera  
tai,  
a la naña ape ñarmarera, naga yoko kuan wowa  
la e porotano ave kinakinasia sane piaki tai  
naña amiyum̄aen ga e porotano. Yauena  
2:9*

““Nam̄areraena na kilaen sanene, Ata tam̄an pan in rui, ana yoko netam̄anlein va kiau yaru nene.<sup>28</sup> Ana pe naga re ga nene poli, ana yar nene, yoko neligan verue naña Melag sike e limana.

<sup>29</sup> ““Yar naña kiligana teke ea, popon naga loge kilale ya naña Ninuna ne Ntewa pisawal ke pa ñegas nen li naleлагаena lala.””

### 3

*Mak na lima, naga pa e sum̄are nae Satis, naga  
sum̄are naña momalio ga mon m̄aga*

<sup>1</sup> “Monar osiri si m̄ak va va navisi na pulku-mali na sum̄are nae Satis, ovisa sanini, ovisave

Visena nene naña pimi pan amiu ne, pimi kome naga naña pisuar ke ninuna la olua kienan ne Ntewa amio kana verue ne la olua.

“Naga pisa pan amiu sanini, sape “In na nekilia ruru kiamiu yumāena lala. Amiyeluar amiu pañisi, asape kam na sumare tai naña mal ruru po, ana peraga, in na nekilia ruru pañisi kam na amare ga amēke na.<sup>2</sup> Nagane pe pogos naña kam na akirava tote narui. Kiamiu yumāena lala, in na nomal sane e visuena kienan ne Ntewa, kam na pe akila make ruru re poli, a kam na akila pe po re nenaga. Kiamiu kapi pe kovio make re poli wa, ana naga sumā panon ke naña lavis mare narui, ana komin sur ne nanene, nepisa ruru pan amiu nesape kam na monar ayumāen ruruia vena imi wo sina.

<sup>3</sup> “ “Visae ve sanene, kam na monar asitomāl si visena wo la naña amloge, a amla rui. Alogear ruruia, a avilon kiamiu malena wasuñe si na, komin naña visae ve atavilo re, nekilia nevisa nena van amiu sanini, yoko neim nomālivin amiu sane yar na vinauen tai naña kam na tañatete akilia.

<sup>4</sup> “ “Ana lelaga, nekilia nesape kam nae Satis, kam pe moki re poli naña asumā pogaga, naña pe akila re mala kulsota la namname poli sane lañasia. La ke narui amekiki ruru nenaga, ana yoko ayen sur yuwowo, ayaloro amio inu meva e kiau yo.<sup>5</sup> Yar a naña taulu naviowaena, naga mēna yoko ayowa ruru wo e kulsota yuwowo la ne sanene. Naga, kienan kia tañatete nena

neyumulua e tus namalena pogos tai, ana yoko nekilologia naga va Ata amio kiena navisi lala, nevisave yar nene naga pe kiau yar lelaga nena napo.

<sup>6</sup> ““Yar naña kiligana teke na, popon naga loge kilia ya naña Ninuna ne Ntewa sumña pisawal ke pa ñegas nen li nalelagaena lala.””

*Mak na orai, naga pa e sumare nae Pilatelpia, naga sumare naña pulmas wo na kilaen yumäena sike e marana*

<sup>7</sup> “Monar osiri si mäk ya va navisi na sumare na pulkumali naña Pilatelpia, ovisa sanini, ovisave Visena naña pimi pan amiu ne, pimi kome naga naña pe wa, a pe lelaga, naña naga ke narui naga þar ke ki na kiluaen pulutava mäna Parin Supë Tepet nanua. Ya naña naga vietavania, tapatete si yar tai kotawea, a ya naña naga kotawea, tapatete si yar tai vietavania.

<sup>8</sup> “‘Naga pisawal pan amiu sanini, sape “In na nekilia ruru kiamiu yumäena rui. Ana monar avisu ruruia, in na nevietava e pulutava tai van amiu naña yar tai tapatete si kotawea. Nekilia mäna naña kiamiu märeraena ve tokak ga, ana nekekara papisi naña apuarar ruru ke kiau visena, a pe akila kare re kiau kia naña teke e amiu poli.

<sup>9</sup> ““La naña ataveve ke Yermare, la apa ke lele taaga vena avisirlua kiela ñegas, a la apisa ke asape la ape le Yu nena napo, ana pe sa re nene poli, apisokan ga. Ana siraunia yoko nekila la nene aim akinai e lamiu vena avisu kilale sane pe kiau sitomieni su re e la poli, ana sike ga e amiu.

**10** “ ‘ “In na nepisa mā pan amiu nanua rui nesape monar asumāl mārera amio sitomen la naña piayavi silaga, ana nepisu sane apuarar ruru kiau visena nene. Komin sur ne nanene narui, nekilia nevisaar van amiu sane visae pupia naloge viowaena yoko imi e yomarava vena kilali la naña asike ea, ana yoko in na nesuwo amiu ruru nena ga, yoko sur nene tañatete tol amiu.”

**11** “ ‘ “Ve ve piavi re, neimin amiu sina. Ya naña asumāl asike e rui, monar auarar ruru mā vano-o neim noworun amiu, ana yoko akilia ala kiamiu nalaena, ana tañatete yar tañena kilia warlua kiamiu karo na pārimiu naña pe kol vetan amiu. **12** Yar naña taulu nakilaliena make ga vano-o neimi, yoko noure naga imi sane pupia kemraþe na loyumā e yumā wa māna Ntewa, yoko yar nene sulue sike loyumā nene narui. Yoko neyowauia naga amio kia la naña nesiri se ea, sane kia kienan ne kietan Ntewa, a kia kienan ne pupia pulkumali, na Yerusalem viu, naña mligan ma e peni kienan ne kietan ne Ntewa pitomi, a amio la nene, yoko nesiri māna kiau kia viu ea.

**13** “ ‘ “Yar naña kiligana teke ea, popon naga logekilale ya naña Ninuna ne Ntewa sumā pisawal ke pa þegas nen li nalelagaena lala.” ”

*Mak na olua pa e sumāre nae Laotisia, naga sumāre naña pa piowa rui, ana pe asitom re sur poli*

**14** “Na maro, monar osiri māk van navisi na sumāre na pulkumali naña Laotisia, ovisa sanini,

ovisave 'Visena naña pimi pan amiu pimi kom pun naga naña pe ñarin sur make ga, naña naga ga kilia visave "Sanene." Naga masisu pona pe lelaga e Ntewa vano tol naña kana kuruta mlau, a naga pe supen wetelun yomarava naña Ntewa siia.

<sup>15</sup> ‘‘Naga pisawal pan amiu sanini, sape “In na nekilia ruru kiamiu yumñaena lala, a nekilia nevisu kilale sane pe kiamiu sitomena la manin manene re poli, a pe pisun manene ruru re mëna poli. Popon manene la naña visae sinomän omanini, ko omanin ruruia, pona visae ovisunu, ovisun ruruia, ana naña sinemiu la peve lua ga sanene, ñelaga nene pe sineun re nenaga. <sup>16</sup> Ana komin naña sinemiu amanini a sinemiu avisun sanene, in na nesape neluelua amiu e logou narui.

<sup>17</sup> ‘‘Kam na asape amiyuwon polo kiamiu sur wo la mokliu, ana kam na asape tañatete yar tai kilia la sur van amiu, kam na amla ke rui. Ana peraga, e kiau navisuena pe sa re nene poli. Kam na pe apisu kilale amiu re poli, ana pe kiamiu sur wo re nena tai, kam na limamiu koren ga, kilamaramiu ñala, a yepemiu mian ga. <sup>18</sup> Nevisa van amiu, popon awasuþe si aim pun inu, aim awar kol nini naña kap kekan van kana namname rui, vena akilia alalar sur wo tai e limamiu. A popon aim awar kulmrae la naña miyuwowo, vena akalo amiu, vena ve amawa re, a popon aim awar mäki na vilanen e kilamaramiu, ana vena akilia akirava sina.

<sup>19</sup> ‘‘Yaru ai naña sineu siia, monar nevis

vania vena nakawe ruru kiena malena, ve sanene, monar ala kiau visena lala, ana avilopu amiu. <sup>20</sup> Ayagogo ruruia! In na nesumāl nesumā nesigariga ke pulutava na kiomā malena. Ko naña ologe pulgou pio, ovietavan inu, neimāsu loyumā italua tesun, italua tekinana.

<sup>21</sup> “ ‘ “Naga naña sumāl mārerera vano-o taulu naviowaena lala, netamān vania sane naga topae amio inu e leleu wa na totanoena, sa ke ga naña in mēna netaulu kiau nasinekar, ana siraunia Ata pere inu netotano ke nemio e lelena wa na totañoena.

<sup>22</sup> “ ‘ “Yar naña kiligana teke ea, popon naga logekilale ya naña Ninuna ne Ntewa pisawal ke pa pegas nen li naleлагаena lala.” ’ ”

## 4

### *Ntewa na lelena naña meta manene laa ma e peni*

<sup>1</sup> Pogos naña nepisu pae sur la nene, nomāl ke sina ga pulutava tai navaen loyumā ma e peni, mēke ga vamon inu. A nemloge ke sina ga pulgo naña pis pan inu nanua, pis na pulgona miyelu keviu sane kumasua, ana pisa pan inu, sape “Ovam meta e nini sumo wa, vena nekila ovisu sur la naña yoko aim sirau.”

<sup>2</sup> Pisa sanene, ana veraga ga, nemloge sane Ninuna ne Ntewa p̄erelua ninuu, mligan inu ma e peni, ana nekira pa e pupia lele wa na totanoena tai mēke ga e marau, naña yerkawa tai totano teke ea. <sup>3</sup> Nepisu sa naña pila, p̄ar maran kilavaru la naña po na po, a kana kap

nena miyervivia sa ga kuperierier.<sup>4</sup> Kana pupia lele na totanoena nena m̄eke ga lika, a lele na totanoena m̄ena lañasa miyervivia, nopolioa tol lualima yam lua pa vari [24]. E la peve taaga, yar taaga teke e tai kila sane la m̄ena tol lualima yam lua pa vari [24], la nene ape nasumonena nae ma e peni lala. La nene, m̄ala kulsota la miyuwo wo pap̄isi, a amien karo na ñarila naña pe kol.<sup>5</sup> Nesum̄a nepisu ke sane, nemilan m̄ena yekarpla ke ga likan yo wa naña paní, amio m̄aaagena na pupia polilu tera ke ea. Vamonia, kap vivaga la olua asum̄a apivavaga, naga nene nane ninuna ne Ntewa olua,<sup>6</sup> asum̄al asike e yotop tai, naña meri ga m̄eke na sa ga sive, pilavila a merarava ruru po sa ga kupito.

Ana likan yo naña paní, yar mali la vari asum̄aga, naña kilamarala la moki liu sike vamon la a varau n la, asum̄al lavisi, asuvivi pupia lele wa na totanoena.

<sup>7</sup> Yar mal ñes nene, sa ga laion, na lua sa ga puluk naña purwolu, na telu naga ñar ga maran yaru, na maro na sane pepaum̄a.<sup>8</sup> La nene, la make ga kupela la orai, naña kilamarala la kalo make ruru m̄ena kupela la nene, pa m̄ena e pulugala.

La nene kiela yum̄aena, legiena a yemalo, la pe aparurula re pog ta poli, la asum̄al apisawal lue ga, asape “Ntewa na m̄areraena na mav a, naga su ñesa, naga sike nagane, a naga sike sike nena. Naga pe wa naña pe wa, naga pe wa pap̄isi.”

<sup>9</sup> E visena la ne sanene, la asumña apisirlua ke kia kienā naga naña totano teke lele wa likan la, apatanon ke naga, asumña apisa ke potena pa naga naña yoko mal lue narui. Pogos naña asumña apisa mñaga, <sup>10</sup> nasumonena mñena la nene apatanonia, amlotun ke naga naña tapatete mare pogos tai. Ana siraunia, aþar plan kiela karo na þarila naña pe kol, amligan su tano se lana, asape:

<sup>11</sup> “Kiamim Suþe Ntewa, mesmesun naña nau-rarena, navatanonena a namñareraena make ga, ala van ko, kiomña ko ga taaga. Ko ke naña osii make sur narui, e ga e kiomña nasinenanena atol kiela malena rui.”

## 5

*Tus naña apulonaria, amio narin sipsip, naña lalua asike ma e peni*

<sup>1</sup> Ana yokorena nepisu si yerkawa nene naña totano teke e lelena wa, naga mlarar ke sur tai e limana marua, sur nena naga tus tai, naña asiri ga e lepas luwoka, þisi na apulonaria, ana atelan kana lok olua suwoia.

<sup>2</sup> Ana nemloge pupia navisi tai pion manene pa metava, piunia pisape “Ane torokin kilaroro lok la nene? Yar tai sike ne kilia vae tus nene woga pona peraga?”

<sup>3</sup> Momña ga sanene pano-o, peraga, pe yar re tai naña ma e peni pona yomarava, pona vatanon yomarava, naña kilia vae tus nene poli, pe yar re nena tai naña torokin kira va loyumña e poli.

<sup>4</sup> Nepisu sanene narui, nemloge piowa, netagi na netagi, naña tañatete yar tai kila.

<sup>5</sup> Ana nasumonena la tai nene pis pan inu, pisape “E, ve otal re sina! Opisu ke ne, nanene naga laion naña molue kome yeririna la nae Suta, naña apio asape lus kienan ne Tepet, naga taulu make sur la pisi rui. Naga ke narui naga kilia kilaro lok la olua nene, naga ke naña yoko vae tus nene narui.”

<sup>6</sup> Ana nekira pano, pe laion re poli, ana nepisu narin sipsip tai sumal sike likan yar mal la vari a nasumonena lala vamon yo wa nene. Naga pe narin sipsip ga, ana kana lamaliu olua amio kilamarana olua asike e þarina. Naga sumal sike na, naga apisu sa naña akila kupapaena e rui, ana mal ruru ga sumña ga. <sup>7</sup> Naga mial pimi, kuslua tus naña petan limana yerkawa na þamarua, metava e pupia lele wa na totanoena.

<sup>8</sup> Mla pae, ana yar mal la vari nene amio nasumonena la lualima yam lua pa vari [24] nene amloru e lana. La peve taaga aþar kiela yukalele lala a kiela piala la naña amiyumæn e kol, pulen ga ponotaninu la naña asikapia, ana kala ponos taninu po paþisi naña pa ke metava, nane leniena lala kienan naleлагаena wa lala. <sup>9-10</sup> A la amiyaun ke yau viu tai naña sanini, “Akuþapain ko,

ana e komña kuruta  
opul plan yeririna lala ape kienan ne Ntewa,  
naña amolue e þegas nen yeririna make ga,  
e visena kar make ga,  
e purvanua kerkeviu make ga,

a e narin purvanua make mēna ga.  
 Ko osikol la apim ape ūegas taaga navatanonen  
     parin supe ve taaga ga,  
 aim ave yar wa lala na yumāena kiena ne Ntewa,  
 naña yoko ave supen yomarava nini.  
 Ana komin naña okila sanene,  
 torokin sane ko ga taaga ola tus nene narui,  
 owar plan kana lok lala, ovae.”

<sup>11</sup> Nesumā nepisu ke sanene, ana nemloge  
 navisi la amiyau, la mok na moki, amā la tenario  
 via na sanene. Amiervivi lele na totanoena  
 wa amio yar mal lala a nasumonena la nene,  
<sup>12</sup> amiyau mārera pañisi, apisa sanini, asape,  
 “Narin sipsip, naña akupapainia,  
 naga taaga po na po.

Namāreraena make ga, nawoena make ga,  
 manmaruaena make ga, puriu kawaena make  
     ga,  
 navatanonena make ga, naurarena make ga,  
     nayeluarena make ga,  
 torokin akila ga van naga taaga.”

<sup>13</sup> Siraun nanene, nemloge si surmal make ga  
 la mēna amiyau, surmal la naña asike ma e peni,  
 amio la naña asike e yomarava, pona e porotano  
 pona e sive, kiela yauena pisa sanini, pisape,  
 “Nayeluarena, navatanonena, naurarena, a  
     namāreraena va va yerkawa naña totano  
     teke e lele wa, amio mēna narin sipsip,  
     vano vano ve uro re.”

<sup>14</sup> Ana yar mal la vari nañani apisawalia asape  
 “Sanene” komin visena la nene, ana nasumonena  
 lala amloru, akinai, amlotun lalua.

**6**

*Lok la olua na tusi naña aplonaria*

*Lok ūlesia: Yerkawa na ūelaga na kilaen mara, naña kus wosi yuwowo*

<sup>1</sup> Nepisu manene māga, nepisu narin sipsip naña kilaro lok na sumo na tus nene. Naga kila pae, ana yar mal la vari nene tai pio e pulgo tai sa naña polilu, pisape “Oimi!”

<sup>2</sup> Ana nomāl ga wosi tai naña miyuwovo sumāl sike e marau veraga. Nomāl yar tai teke meta ea, ūpar ke viu lamias, ana la amligan karo na ūparina kienā ūparin suūte teke e ūparina, ana kus kienā wosi nañpani kirir pano sane yar namara tai naña vanon vena taulu kienā nasinekar lala.

*Lok na lua: Yerkawa na ūelaga na weñaren yaru, naña kus wosi pivaga*

<sup>3</sup> Yoko narin sipsip kilaro lok na lua. Kila pae narui, ana nemloge yar mal na lua pio, naga mēna sape “Oimi!”

<sup>4</sup> Ana wosi tañena ke sina ga pimi kate veraga, naña pivaga. Yar naña kusia, atamān pania vena va war plan sumārena naña sike e yomarava, vena yar la asunña awewe morñar la. Amligan pupia playu na mara tai e limana, ana naga mēna kiriri pano.

*Lok na telu: Yerkawa na ūelaga na visoena e yomarava, naña kus wosi malko*

<sup>5</sup> Yoko, narin sipsip kilaro lok na telu. Kila pae narui, nemloge yar na telu pio, naga mēna pisape “Oimi!”

Ana nepisu ga wosi si tai naña malko sumäl sike e marau veraga. Yar naña kusa, naga mlarar ke skel tai e limana, vena visuveve kinanena lala kana yeririna na yomarava.

<sup>6</sup> Ana nemloge visena tai molue ga likan yar mal la vari nañani, asape “Ovano, atamän pan ko asape okilia okila naña yo ve plasan kinanena, naña yoko monar aul narin kinanena ga e kilavaru keviu. Ana ve okila kare mañene re purþes nen purolip lala naña amiyumñaen ke sirveve e mrasnela, a ve okila kare manene re purþes nen kilkerep lala naña amiyumñaen waen e mrasnela.” Apisa sanene narui, a naga mëna kiriri pano.

*Lok na vari: Yerkawa na ñelaga na marena, naña kus wosi na yepen pe yavi*

<sup>7</sup> Yoko, narin sipsip kilaro lok na vari, kila pae ana nemloge yar mal na vari pio, naga mëna sape “Oimi!”

<sup>8</sup> Ana nomäl ga na wosi taþena naña yepena pe yavi sumäl ga sike e marau. Yar naña kusia, apio kienia kia asape Marena, a naga, kienia erau tai mial ke amio, naña kienia kia asape Pulukapi. Ana e lalua nene, atamän asape lalua akilia akila viowa va yar ve moki e yomarava, e playu na mara, pona e viso, pona e maiena, pona e surmal tetan lala. Visae ve sanene, yar la vari asike yomarava, la telu akilia asururu ga, ana taþena tai akilia akilapel naga sanene.

*Lok na lima: Li na lelagaena la naña ape masisu pano-o amemomär la*

**9** Yoko, narin sipsip kilaro lok na lima. Kila pae, ana nomāl wonta pulen ninuna ne yeririna lala amiyuwon la miyervivi miasina. Nanene la naña amemomñar la komin amarera e logearen visena kiena ne Ntewa, a asumāl mārerera asape amlelaga e Yesu. **10** La nene, nomāl atag ke pa Ntewa e pupia pulgo keviu, asape “Ake Suñe na sur make ga, ope wa a ope lelaga, awis ovisu kilale kamim kuruta nene. Pogwai naña yoko okila maran va yar viowa la naña akila ke piowa sanene?”

**11** Apisa pa sanene narui, ana aþar kulsaket yuwowo la pan la amiyenia, ana apisa pan la asape sur naña la apiunia naga pere wa. Asape monar asumate li ga ve plas ga wa, komin naña kiela erau laþasa asike ga wa, amio mëna kiela puruvi taþena lala a vinela lala, naña yoko la mëna monar awe momñar la komin naña amlelaga, ana pogos naña la punu ga aimi toroki, yoko Ntewa kila ga ya naña la apiun na wa.

### *Lok na orai: Legiena maro*

**12** Yoko, nepisu naña narin sipsip kilaro lok na orai. Kila narui, yemninu veraga, a pe piavi re poli mrae pimi malko yemalolo nenaga, a kupario pimi pivaga sane kuruta, **13** a verue la naña asike ma e sinapane akekapil apitom tano e porotano, sa ga naña mralak mene, pogos naña pupia lagi miyui kululun lasa. **14** Yoko, avilonar sinapane sa naña apilonar takue akus pano, a

**6:12** Nakilol 11:13, 16:18; Mat 24:29; Mak 13:24,25; Luk 21:25

**6:14** Nakilol 16:20

tavie make ga a purvanua make ga alen plan la vетан lelela lala.

<sup>15</sup> Ana pogos naña yar la avisu sur la nene, pupia marauena naña pupia marauena. Parin supe na yomarava lala, yerkawa lala, nasumonena kienan ne yar na mara lala, yar na sur moki lala, yar märera lala, amio mëna kiela yaru na yumaena lala, a yar tañena make ga e yo kar ga lala, la make ga ayalin mesmesun puluve lala pona pulkilavaru, avavinin yo la metava e kunusa, akilayonli naña atapolou ea. <sup>16</sup> Atol yo la nene, ana marauena pimi kevieu manene laa, a apion pa kilavaru lala amio kunus lala, asape “Awis, aloru akalo ruru imimi, vena navisuena kienan ne naga naña teke meta e lele wa ve tol imim re, a vena nasinekar kienan ne narin sipsip ve kila kare imim re. <sup>17</sup> Pupia legiena na sinekar kienan la lua nene pimi rui, a yoko ane kilia sumalu mali e pogos nene? Peraga ne, nagane yoko viowa manene laa van ita make ga.”

## 7

*Ntewa pisaar kienan pupia pegas nen yeririna tai vena ave kienan*

<sup>1</sup> Siraun sur la nene, nepisu navisi la vari asumal asike e mräpun yomarava varoka, asumä akilawo ke lagi vari naña amiyui ke e yomarava, vena lagi la nene ve ayui re si e sive, pona e porotano, pona meta e lak lala. <sup>2</sup> Yoko nepisu ke sina navisi tañena, þar sur na ween totou kienan ne Ntewa mali van kienan yeririna lala, ana naga molue e naña mrae pa meta ea pimi.

Naga kilia mā sape navisi vari nene, la aþar ke nam  reraena na  pa akilia akila kare porotano a akilia akila kare sive, ana naga pion manene pan la, pisalu  par pan la vena ve akila re si sur tai.  
<sup>3</sup> Pisa sanini, sape “Ei, toko, ve akila kare re sive pona porotano pona lak lala, vano vano tol na  pa teligan totou tai te piamenan yar mesmes lala na  pa ape kiena ne kieta Ntewa.”

<sup>4-8</sup> E pogos nene narui nemloge ga na wa na  pa apisawal nena maran la na  pa amligan totou e la. La nene amolue akom e lus nae Israel la lualima taaga pa lua, naga lus la na  pa aþar kia kiena yermarua apua kan la nene, nane Suta, Rupen, Kat, Asa, Naptali, Manasa, Simion, Levi, Isak, Sepulan, Sosep, a Pensiman. Ana e lus make la nene, tai kana manu lala tol lualima taaga pa lua [12,000] amolue komea, kila la punu ga tol sane kana manu ne lala tol ponotia lualima yam vari pa vari [144,000].

### *Pupia   egas ta  pena lala na  pa amiyen kulsota yuwowo lala*

<sup>9</sup> Ana siraunia, nekira pa vamon inu narui nom  l pupia   ina na yeririna lala, na  pa moki na moki, ta  patete auloia, la ke na  pa amolue akom e lus ta  pena la narui. La ke na  pa ape yeririna ta  pena lala na purvanua ta  pena lala, amio kiela visena ta  pena lala, apim asum  l asike vamon pupia lele na totanoena na  pa narin sipsip totano teke ea. La make ga amien kulmrae yuwowo nowo lala, a aþarar m  m  la lala,  
<sup>10</sup> a apio manene pa metava, asape “Kieta Ntewa teke

e kiena lelena wa, naga ga amio narin sipsip, lalua ape pur̄pes nen kiesta natamaliaena.”

<sup>11</sup> Ana amio la nene, navisi m̄ena lala asumāl amiervivi yo wa, a amiervivi m̄ena nasumonena lala amio yar mal la vari nañpani, ana la m̄ena akinai añañ parila pito tano vamon yo wa, amlotun Ntewa, <sup>12</sup> asape

“Ee, lelaga pa!

Nayeluarena make ga, a naurarena, a namanmaruaena, a navisaen potena, a navisirlu-aena, a puriukawaena, a nam̄areraena, la punu ga nene ape kiena ne kiesta Ntewa naga taaga, a yoko ve sanene sulue na sike ne. Yeluaren van Ntewa!”

<sup>13</sup> Ana e pogos nene, nasumonena la tai piuntan inu, sape “Pupia ñina naña amiyen kulumrae yuwowo la ne, okilia osape a la nene, a okilia osape la asu pe na apimi?”

<sup>14</sup> Ana nesape “E peraga, ana ko ope yerkawa nae e nini tai, ko okilia m̄a yo?”

Ana pisatam̄ea sape “Ore, la ke nene narui naña aþaro e pupia pogos naloge viowaena. Kul-sota la ne amiyen ke ne, akevanla e kuruta kana narin sipsip nañpani, nane apim amiyuwowo ruru sane opisu ke ne. <sup>15</sup> La na kiela yum̄aena sanini, sane

‘La asike vamon yo wa kiena ne Ntewa, legiena a lemalo amiyum̄ae kiena ke loyum̄a e m̄ana yum̄a wa,

a naga naña totano teke meta ne, naga yoko visuar la,

<sup>16</sup> Yoko tapatete si viso kar la,

yoko ve moto karla re si narui,  
 mrae ve kila kare la re sina,  
 a pupia kapi ve visun la re sina,  
<sup>17</sup> komin narin sipsip naña teke likan yo wa meta  
 ne,  
 naga yoko vagan la,  
 naga yoko sumon la ava e purþes nen wii na  
 malena,  
 a yoko Ntewa yumu plan make wamarala.’ ”

## 8

### *Lok na olua: Yo pa ruru nenaga*

<sup>1</sup> Siraun nene, nepisu narin sipsip kilaro lok na olua. Kila narui, sur make ga nae mae peni aparurula veraga, pe mñaagena re si ta poli, yo mño nena ga mon mña pano-o tol komsus nen aora taaga.

### *Kumasua la olua*

<sup>2</sup> A pe yam piavi re nenaga, nomal navisi la olua naña asumal asike e marana ne Ntewa vena kilaen kiena yumñaena, a amla kumasua olua pan la, tai kus tai, tai kus tai.

### *Pias nen ponotaninu naña amiyumñaen e kol*

<sup>3</sup> Ana siraunia, navisi taþena pimi. Naga kus pias nen ponotaninu tai, naña amiyumñaen e kol, a naga kus pimi sumal sike e wonta, naña naga mña amiyumñaen e kol, a naña sike vamon lele wa na totanoena. Ana aþar ponotaninu mokliu pania vena sikapia e wonta vena kila ponos wo, a amla mña leniena lala kiena ne naleлагаena wa lala pania, vena ligon to meta e wonta sane nalaena tai. <sup>4</sup> A pogos naña kapi nene kekan

ke ponotaninu nena, kana ponosa amio leniena kienā ne nalelagaena wa lala, amolue petan limana ne navisi nañpani akaka ava atol marana ne Ntewa.

<sup>5</sup> Yoko, navisi nañpani þar plategkap lañpas nañpa apranar sike e wonta nene, kokonia pito e pias nen ponotaninu nene ana koven pito tano e yomarava. Ana pogos nañpa suri nene tol yomarava, kila polilu kapur kar ga e yo punu ga, amio kana mumuena sa nañpa kapiapo, amio m̄ena yekarpla, a yemninu.

### *Kumasua na miyelu þesa: yua amio kuruta*

<sup>6</sup> Ana navisi la olua nañpa aþarar kumasua olua nene, asu ruru ke nañpa asape ayu narui.

<sup>7</sup> Navisi na sumo miyu kienā kumasua, ana kila narui mrayua la nañpa m̄arerera sane kururu kilavaru, amio kuruta nañpa pisusun sane kapi, aptom akila mom̄ar sur kar la e yomarava. Amiyumñaen m̄a sanene pano-o kapi kekan make yomarava komþasa amio kana purlaki ne lala, amio sur make nañpa kapur sike ea.

### *Kumasua na lua miyelu: tavie na kapi*

<sup>8</sup> Ana siraunia, navisi na lua miyu kienā kumasua. Nanene kila pupia tavie kar tai, nañpa kap molue ke komea, akovenlua pito e sive. Pogos na kove sive, ana sive komþas pimi sane kuruta, <sup>9</sup> ana kana sur mal ne lala amarmare, a waa la nañpa asike e pupia lepas nene atalilu.

### *Kumasua na telu miyelu: verue nañpa kirir ma e sinapane*

<sup>10</sup> Yoko navisi na telu miyu kiena kumasua. Nanene kila pupia verue tai, naña kapi pivaga ke ea tegoli yo sane kapi vivaga, molue ma e sinapane, miere pitomi miae yomarava. Ana kana kapi nena pa tol wii la naña mlau a ñarin wii lala. <sup>11</sup> Kia kien verue nene, asape Wii Melkalka, ana kila narui wii nae yo la moki pimi melkalka, ana yeririna la amun ñele ga, moto karla mña pano-o amarmare.

*Kumasua na vari miyelu: yemalolo*

<sup>12</sup> Yoko navisi na vari miyu kiena kumasua. Nanene kila naña mrae komþas pimi malolo, a kupario komþas pe tego re si poli, a verue la moki naña pe amal la re si poli. Kila narui legiena pimi plas manene laa, a pe lepamiema re si poli, kila narui yemalolo paþisi e yomarava wetelu.

<sup>13</sup> Nepisu manene ke sane, nomal pupia pepaumña tai ka ke metava, sumña mlolokai kar ke metava na, pisape “Yo piowa rui e, ana na nene naga kulus ke na wa. Navisi la telu asike ga wa, la kiela kumasua miyelu ñarera manene laa sane. Kam na yomarava, avisuar amiu, pupia na loge viowaena pimi maliiv ke narui!”

## 9

*Kumasua na lima miyelu: pulus naña pito manene laa tano, naña na þesia na loge viowaena ñarera na telu*

<sup>1</sup> Yoko navisi na lima miyu kiena kumasua. Nanene kila verue taþena kirir maliia ñarpoyo ma e sinapane pitomi e yomarava. Verue nene,

amla ki tai pania, nanene ki naña vietavan pulus naña pito tol kap naña garo tano. <sup>2</sup> Pogos naña mlalua keplamaran pulus nene, kapi piu þar wowo yo molmolue ke ea, sa naña pupia kap tai piu, ana pa kar ga meta e sinapane, kilawo maran mrae, kila yemalo ke sina ga. <sup>3</sup> Ana pogos naña kap piu kalo make yo sanene, kelsisi la amolue apitom tano e porotano, ana pe asa re si kelsisi poli ana apim sa naña pupia kimi natano.

<sup>4</sup> Apisaluþar la asape ve atol re purlaki lala a kinanena lala pona sur la naña pitotovi sike e yomarava, ana atamän asape akilia akila viowa va yeririna na yomarava lala, la naña pe aþar re totou kiena ne Ntewa naña naga mligan sike nena e piamenana ne kiena yeririna lala. <sup>5</sup> Kimi na tano la nene, pe atamän la re naña akilia awe momnar yar la poli, ana atamän la ga ayuyur la mä va tol kupario ve lima. Ana pogos naña akila mä sanene vano-o, yoko yar la aloge yepela la lalae kar vano vaþisi. <sup>6</sup> E pogos nene, la ve moki na asave popon amarmare ga, yoko akale mrapa la naña amare ea, ana yoko marena yepen mavin la, ligon la asumä ga sanene.

<sup>7</sup> Ana kelsisi la nene, pogos naña nepisu ruru la, atorokin wosi la naña yar namara la akus ke ne. Amyen karo naþarila naña pe kol suwo þarila, a pogos naña nepisu ruru marala, nemilan la ga asa ga yaru. <sup>8</sup> Amë vilþarila sane sira, ana maluelala lala, sane na maluena laion. <sup>9</sup> Amyenwo yerela lala e pototo, a pogos naña akaka tetai, kupela la kakapur mälia sa naña wosi la naña aþere kiela kat lala akiriri ava akila

mara. <sup>10</sup> Kelsisi la nene kesila sike e la, a sur na yuren yaru lala sike e la, naña akilia ayur mā yar vano-o tol kupario ve lima.

<sup>11</sup> La kiela ñarin supe tai, naga navisi tai, ana pe navisi kiena ne Ntewa re poli, naga navisi naña pisuar ke mratava na pulukapi. Yar nene, kiena kia e visena kiena le Epru lala, asikia asape Apatono, a e visena nae Krik, asikia Apoliono, kinas nen kia lua nene asape yar na warnena kareen suria.

<sup>12</sup> Kelsisi ne la nanene, naña nasumo e naloge viowaena la telu nena nanene. Nomāl naga ñaro pa rui, ana lua sike ga wa.

*Kumasua na orai miyu: navisi lala na wemaren yaru, naña nalua na naloge viowaena ñarera na telu nene*

<sup>13</sup> Yoko navisi na orai miyu kiena kumasua, nemloge visena tai molue kom e mrapun wonta wa nene varoka naña amiyumñaen e kol naña sike e yo wa vamon Ntewa. <sup>14</sup> Visena naña pisa pa navisi nene sanini, sape “Navisi la vari naña apiar la asike e yo naña wii mlau ke ea naña kiena kia Yupretes, nagane kana pogos naña ova okila plan la sina avavano narui.” <sup>15</sup> Navisi la nene, apuarar la ruru asumña sanene pano-o tol nena kana aora na kana legiena na kana kupario, naña akilia amolue ea vena akila kiela yumñaena. Ana navisi tañena pa mluñpar plan la, kila sane amolue apano, apa kar ga e purvanua lala ame yar lala lavis tol kompas nen yeririna na yomarava.

<sup>16</sup> Apa amio kiela yar namara lala naña akus wosi namara lala, ana nemloge apisawal kana

marana tol tenario tol ponotia lua [200,000,000].

<sup>17</sup> A pogos naña nepisu manene wosi la nene amio yar la naña akusia, nomal pototo sur tai naña amligan mono ke yerela, amiyowa ruru la apivavaga sane kapi, amemaena sane lowe memaena, amleleru sane mrae. Kiela wosi lala ape tañena ga, naña ñarila sa ga laion, a pogos naña amiyuveve nomal kapi a mäu a posnoyavi na kapiapo mleleru molue petan logola. <sup>18</sup> Sur la telu ne nanene, sane kapi a mäu a posnoyavi na kapiapo kila lavis yeririna na yomarava nini la kompas akokovio e pogos nene. <sup>19</sup> Namäreraena kien wosi la nene sike e ya naña molue ke kome logola, a sike mëna e kesila lala, komin kesila la pilolon sane lomara, a sur sane ñarin lomara mëna sike e luas nen kesila naña mla ke pupia magka pa yeririna lala.

<sup>20</sup> Napiowaena la ne märera papisi sanene, a pupia kompas nen yeririna lala, nane lañas naña amal ke na wa, pe asitom re poli. Pe apulon la re nena e kiela napiowaena la naña akila ke e limala poli, ana asumña akila luen ga lotena pa yermare lala, a asumña akila ke leniena pa nono lala na kiela ntewa lala, naña pe akirava re poli, a pe amloge kilale re sur poli, naña pe amiyal re poli, naña yar ga la amiyumñaen e kol, pona selpa, pona pototo, pona kilavaru, pona laki.

<sup>21</sup> A amio mëna nanini, pe apulon la re nenaga e ñelaga na wemaren yaru poli, pona kimi lala, pona nakilaen viowa amio sira, pona e kiela vinauena la naña asumña akila ke ne.

# 10

## *Navisi tai mlarar narin tus naña apilonaria*

<sup>1</sup> Ana siraunia, nepisu si navisi m̄arera tañena molue ma e peni pitomi tano. Naga mien lul sa naña m̄ana kulsota, a kuperierier miervivi ñparina, marana m̄ena ga sane mrae, ana lana luwoka sane pupia kemrapē ana ape kapi. <sup>2</sup> Ana nepisu naga tarar ke narin tus tai, naña pike ñpa teke e limana luwoka. Ana piap̄ereren lana marua piawa ke e sive a lana m̄el piawa ke e porotano. <sup>3</sup> Naga sumñalar ga sumña sanene, ana mligan pupia vioena tai naña sa ga laion, a pogos naña naga kila, polilu make kar ga lala apisatam̄e pimi, apis kome kiela mumuena lala. <sup>4</sup> Pogos naña polilu la atera sanene, sineun nesape nesiri plan kiela visena lala, ana lavis nekila narui, visena tañena molue ma e peni pitomi pan inu, sape “Toko, ve osiri re visena kiena ne la nene. Sur la naña apisa, pe nakilaen re yeririna la akilia poli.”

<sup>5</sup> Visena nene sanini, ana nomñal ga navisi naña piawa e sive amio porotano, kian limana marua pa ma e peni. <sup>6</sup> Ana pisa kiena visena m̄arera tai, pisaar e kia kien naga naña mal sulue, naña sii peni amio ya la naña asike ea, amio yomarava a ya la naña asike ea, amio sive a ya la naña asike ea. Kiena visena pa sanini, sape “Nagane pe pogos na sumateen re si poli! <sup>7</sup> Lavis ke navisi na olua nene yu kiena kumasua narui, a visae kila ga rui, vera na nasitomwanena kiena ne Ntewa la imi m̄alivi rui, vera na sur make ga imi

merarava ve sa ga naña naga pisawal p̄esan pa navisawalen la naña amiyumāe kienā p̄esa.”

<sup>8</sup> Pisa pa sanene narui, in m̄ena nemloge visen tañena molue ma e peni pitomi pan inu, sape “Narin tus naña pike teke e limana ne navisi naña sumāl sike e sive a porotano, ova ola ke ne wa.”

<sup>9</sup> Ana nepa lavisin navisi nañpani, nepiun narin tus nene tania. Ana tamān ga pan inu, sape “Poga, okilia olavia. Visae olavia monar okania. A nesape nevisa van ko sanini, pogos naña okania, yoko ologe kiki e logomā vāp̄isi, ana siraunia, yoko ologe melkalka e mopomā.”

<sup>10</sup> Ana nemlavia nakania, ana kiki e gou pāp̄isi. Ana nesinom pae, ana sanena naña pisa, naña sur nene melkalka, kila kare m̄epeu pāp̄isi.

<sup>11</sup> Yoko, visena pitomi si pan inu yam tai, sape “Yoko ve sa ga nene narui, komin navisawalena tañena la asike ga wa naña yoko monar oto ovisawal sina, naña apisayu p̄egas nen yolai lala, purvanua punu ga, yaru na visena tañena la punu ga, a p̄arin supe la naña asike e yomarava.”

## 11

### *Yar la lua na iilaaren visen kienā ne Ntewa*

<sup>1</sup> Ana e pogos nene amligan kiai tai te lumāu, asape neva nela totou na yo la ea. Asape, “Ova e yumā wa m̄ana Ntewa, ola ruru kana totounena na kevieu pa sanape, a ola totou na wonta naña sike loyumā ea, a oulo m̄ena yeririna la naña akila ke lotena e yo nene, sane m̄a tol via. <sup>2</sup> Ana

kana pupia yo naña mēke vanua, naga ve ola re kana totounena, komin yumā wa nene kompasa yar la naña pe ape Yu re poli la yoko akusia. Wolawa la nene yoko aim ataulu pupia kumali wa nene Yerusalem, yoko aim loyumā ayalor kar ga ea sa naña la lelela, ana yoko akila ga va tol kupario ve lualima yam vari va lua [42].<sup>3</sup> A pogos naña asike e nene, yoko yar lalua naña asumāl mārerera asike e kiau visen lelaga aim amālivī. Lalua ayen ga kulupak sa naña māla kulsota, a yoko avisawal kiau visena e siarena na kupario la nene va tol luasa, naña kana legiena nena tol manu ve taaga ponotia ve lua lualima yam orai [1260].”

<sup>4</sup> Yar lalua nene visena wā kiena ne Ntewa pisayu la nakonua rui, naña pisayu sape purolip lalua asumāga, pona naña pisayu kemrapē na kantel lua, naña luoka ga asmāl asike e marana ne kieta Ntewa naña naga pe supēn yomarava wetelu.<sup>5</sup> A visae yar tai kilali naña kila viowa va lalua nene pogos tai, yoko kapi kilia molue e logola, yoko kilia kilapel ruru nena kiela nasinekar lala. Nane mrāpa ne nanene naña visae yar sinenan sape kilamār la, yoko naga ga kan ke sina kiena marena narui.<sup>6</sup> Lalua nene kiela namārereraena keviu liu, naña akilia akilawo sinapane metava vena yua tañatete kove e pogos naña apisawal visena kiena ne Ntewa, a akilia akila wii lala imi ve kuruta, a akilia akila naña sur viowa kar ga imi pona pogos mārerera imi kila kare yomarava e pogos ya naña lalua asitom asape akila.

<sup>7</sup> Ana lalua nene, lalua ave navisawalen sanene vano tol pogos naña lalua akila yumñaena na sanene ūsi. E pog nene narui, yoko pupia sur mal viowa naña mēke tano e pulukapi molue vamin lalua, a yoko kiena namñareraena taulu la luwoka, kilanñar la. <sup>8</sup> A yoko akoven tasnela mēke likan mrapplepa e pupia pulkumali naña naga pulkumali mā nena naña kiela supe naga mēna amēmaria meta e lak torovia. E nene, naña e ūlaga na visawanen suria, apisa kia na kumali nañpani, pogos tai asape kia na kumali marua viowa naña Sotom, pona apio asape Isip. <sup>9</sup> Tasnela momña ga e yepisun sanene yoko ūegas nen yeririna lala, pona lus lala, pona visena lala, pona purvanua la aim avisu la, yoko avisaluþar la ve asinla re vano-o tol legien ve telu komsusa. <sup>10</sup> A pogos naña apisu mā tasnena yar mare lua nene pano-o yoko apisa karela paþisi a apitalia kare la ūsa. Yoko asitomñal naloge viowaena lala naña navisawalena lalua akila pimi pa yar na yomarava lala, ana yoko akekara na akekaran naña lalua nene amare pa rui, yoko akila pupia paþagena a yoko awarwar si nalaena lala van la vanonia.

<sup>11</sup> A pogos naña legiena telu nene komsusa þaro pae, pe asin re luwoka poli wa, la amilan ga lagi na malena tai molue kome Ntewa pitomi tol maren lua naña ne, kila si la ga luwoka asumñal aþanarla asumñal asikena. Pogos naña yar la apisuia, amarau na amarau, <sup>12</sup> a pe yam piavi re poli, amloge pupia visena la kom ma e peni pitomi, pisa pan lalua, sape “Poga, amlua avam

metava narui.” Ana la ga luwoka apa metava veraga, akus lul lala apa atol ma e peni, naña kiela nasinekar lala apisu sane asumālu wowe ga asikena, logola suwowo ga rui apis re si poli.

<sup>13</sup> A e ke e pogos nene, pupia yem-ninu, naña kila lepas nen pul kumali nene kompas, yumā make ga akekapil apororowa make nenaga, a yeririna la naña amarmare e yemninu nene tol manu olua. La naña amal ruru ga asumaga la apisu ke sur nene, amarau kar þan wa, ana apisu sane popon la ayeluar ga Ntewa nae peni komin kieno pupia märeraena naña la apisu kilale ga na wa.

<sup>14</sup> Yemninu nene sur sane pupia naloge viowaena na lua þaro narui, kana yam telu nena pere wa, yoko naga ve ve piavi re na imi.

*Kumasua na olua mielu: pogos na lipereena,  
naña kana naloge viowaena märera maro na  
teloka nanene*

<sup>15</sup> Yoko navisi na telu miyu kieno kumasua. Nanene narui kila pulgo la moki apisasawal ke pupia visena la ma e peni, amieluar Ntewa apisa sanini, asape

“Nagane narui yo punu ga naña sumo sike vatanon suþe viowa na yomarava nini, la asike vatanon kieta Suþe Ntewa narui, lalua kieno Navisaarena, a yoko naga ve þarin supen vano-o taþatete þisi pogos tai.”

<sup>16</sup> A nasumonena mëna la lualima yam lua pa vari [24] amio la, naña atotano ateke e lelela

la naña pa metava, akinai tano vamon Ntewa, amlotunia,<sup>17</sup> asape

“O Ntewa keviu namäreraena na mavá, ko naña  
osu nakonua rui, ko naña osike nagane, ko  
naña ope na pogos la ne pimi ke ne.

Mepisa potena pan ko pañisi wa, komin naña  
oñparar kiomña pupia märeraena rui, na-  
gane narui osumálú märera e kiomña na-  
suñenena.

<sup>18</sup> Purvanua make ga na yomarava nini sumo  
na sinela kar ko, ana pogos na kilologiaen  
kiomña sinekar van la narui.

Nagane kana pogos naña yoko olipere yar mare  
lala, a yoko okila kare yeririna la naña  
akila kare kiomña yomarava.

Ana kiomña yar na yumäena lala, naña navi-  
sawalena lala, amio kiomña li naleлагаena  
wa lala, a la naña apatanon ke kiomña  
kia, yoko awar kiela nalaena wo la e  
pogos nene, pe sur koren ga naña ape  
yerkawa lala e kiomña yumäena, poná pe  
ape yerkawa re poli.”

<sup>19</sup> Ana e pogos nene apietavan yumä wa mäna  
Ntewa ma e peni e marana yeririna lala, a amäl  
pias nen navisaluaena wa mon mäga. Amilan ga  
yo pe tañena veraga, komin namäreraena kiená  
ne Ntewa sike ea, naña yekarpla e yo punu ga,  
amio polilu tera, yo mäaga, yemninu, a pupia  
mras nen yua aes kekapili.

## 12

### *Sira nowo amio pupia nopi tai*

<sup>1</sup> Nepisu manene ke sur nae peni lala wa, ana nemilan ga pupia kile tai. Naga sira tai, naga kus mrae, mien pe māna kulsota, sumāl sike e kupario, a karo na pārina, verue lualima taaga pa lua [12] sike ea. <sup>2</sup> Sira nene mēpēna, ana mloge piowa mlokai na mlokai, komin kiena kupario pīsi narui, lavis waria.

<sup>3</sup> Nepisu manene mā sanene, pupia surmali tāpēna molue ma e peni, naga pe namarauena manene laa. Naga pupia arman nopi tai, pivaga, pārin olua nāpā amien karo na pārin supe olua sike e la, a lamāliu mēna sike e pārilā, make ga tol lualima. <sup>4</sup> Ana nomāl ga sur nāpā kūpīn kesina sane, ku plan verue la mokliu akekapil akowowo yo tano e yomarava. Ana sur viowa nāpani pimi sumālar se maran sira nene, naga sitom ruru rui sape sa sira nene war sisi, karmār ke veraga.

<sup>5</sup> Sumā sanene pano-o sira nāpā pārlua narina, pe yermēne. Ana Ntewa sinenan sape sisi nene imi ve pārin supe vena uuarar pototo e limana vena ve supēn yeririna na yomarava lala, ana pogos nāpā sur mal viowa nene pe tol re sisi nene poli wa, ana akuslua veraga, akuslua pa ma puna ne Ntewa māe kiena pupia lele na totanoena. <sup>6</sup> Ana sira nene marau, pure pa tapolou e yomema, e yo tai nāpā Ntewa kila ruru pe lelena, ana pa tapolou e yo nene, apisuar ruru naga e legiena moki, legiena tol manu taaga ponotia lua lualima pa orai [1,260].

<sup>7</sup> Ana e pogos nene pupia mara tai kapur ma e peni. Par navisi nene Maikel amio kiena navisi lala, akila mara amio pupia nopi nañpani, ana naga m̄ena ga amio kiena navisi lala akila mara m̄arera pañsi pan la. <sup>8</sup> Akila m̄a mara sanene pano-o, tol naña nopi nene, kiena nam̄areraena ñsi, ana amio kiena navisi lala amloru apito tano. Ana akila kare la pañsi, amla nakoaena pan la, aþar plan lelela ma e peni petan la. <sup>9</sup> Ana pupia nopi nañpani, akovenlua nena ma e peni veraga pitomi e yomarava, naga amio kiena navisi lala.

Ana e poglis nene nepisu kilale ga pupia arman nopi nene na wa, naga ke ga naña kus maran loñara nanua sumo narui, naga yar sur naña asape Yermare, pona Yermare Lego, naña nanagane naga ke na wa, naga ñere yomarava nini wetelu kuspal ke mrapa silaga.

<sup>10</sup> Ana siraunia, nemloge pulgo tai pio þar make yo ma e peni, sape

“Nagane na natamaliaena kiena ne Ntewa sumálau,

puriukawaena kiena ne Ntewa tauluia,

nasuþenena kiena ne Ntewa pimi m̄alivi,

nam̄areraena kiena ne kiena Navisaarena pimi m̄alivi, mon metavan make suria.

Yar viowa nene naña sumá pisa kare mratava puna Yesu, akovenlua naga rui.

Legiena a lemalo sumál ga sike e marana Ntewa kilali naña visawal mlamulen viowa kiena ne yeririna lala,

ana nagane narui, akovenlua naga rui.

<sup>11</sup> Nalelagena la mokliu naña pe asitom re si  
kiela malena la poli,

pe amaraun re si marena poli,

ana la asmäl märera mä pano-o ataulu yar viowa  
nañpani,

a ya naña la apuarar ke e limala vena akila mara  
amio,

naga kuruta kana Narin Sipsip ga, amio visena  
lala navisawalen kiela lelagaena e Yesu.

<sup>12</sup> Ataulu yar viowa nene rui, sane nagane ma e  
peni, amio la make naña asike ea, akilia  
akekara na akekara,

ana la naña asike e yomarava pona sive, amloge  
piowa a monar amarau,

komin Yermare pito tano sike likan la amio sine-  
mimiena naña pule manene laa, komin  
naga kilia sape kieno pogos plas ga teke  
na, lavis naga pisi narui, ana sirag manene  
laa.”

<sup>13</sup> Visena nene yar tai pisawal ma e peni,  
nemloge pae, pisi na nomäl noipi nene pisu kilale  
naña akovenlua naga pito tano e yomarava, ana  
sinena mimi laa narui, naga pisaar märera sape  
yoko monar tol sira naña þarmare ga narina na  
yermene nene na wa. <sup>14</sup> Naga pa märeran si pa  
sira nañpani, ana milan ga amligan kuden lua pa  
sira nañpani, sa naña kuden pepaumä, vena ka  
va tapolou e yo tai e yomema naña akila ruru pa  
rui vena avisuar naga ea. Naga pa sanene narui  
pupia noipi nene taþatete si tol naga e yo nene,  
asape yoko naga sike e yo nene pogos ve piavi

towe m̄aga naña kas tai, siraunia kas ve lua, p̄isi komssus nen kas si tai.

<sup>15</sup> Ana nōpi nañpani pisu sira ka pano, naga kilia ga sape tañatete si va war po yo, naga sinen mimi laa narui, plamolue mliluan pupia womie tai vena werelua sira nene va talilunia. <sup>16</sup> Pupia wii nene mlau pano, lavis tol sira nañpani, ana amilan ga yomarava sinen miye sira nañpani, miila naga naña porotano purp̄a veraga pikepaia sa naña pupia logona, sinomlaun ga wii naña nōpi nene mliluania. <sup>17</sup> Nōpi pisu narui, nagane kienā sinemimiena pimi piowa laa narui, ana mligan sira naña sike na, sape vanon ga narina tañepa lala, nane yeririna la naña asumā ataveve ke navisaluaena kienā ne Ntewa, sane la naña apuarar ke visena kienā ne Yesu m̄arera.

<sup>18</sup> Pisa pa sanene narui, pano amio kienā pupia sinemimiena, panon kila mara amio tañepa la nene.

## 13

*Surmal viowa p̄esa, naña molue e sive, nōpi  
mla nam̄areraena pania*

<sup>1</sup> Pupia nōpi mialoro pitove, sumāl sike yepas nen sive. Ana pe piavi re poli, nomāl ga surmal tai molue e sive paminia. Yar nañpani naga ñarinā olua, a kana lamāliu tol lualima, a e kana lamāliu la peve taaga karo wa na ñarila kienā ne ñarin sup̄e lala telan sike ea. A e piamenala la peve taaga, asiri kia tai sike e la, naña na viuelena nawarnena kareen Ntewa. <sup>2</sup> Surmal nene, nomāl pe tañepa ga, naga sane sape ve sa tote m̄a laion,

komin logona sanena laion, ana lana varoka sane lana surmal tañena naña pea. Ana naga pimi sumalu sike e nopi nañani, a nopi mla puriukawa pania, kila naga pe ñarin supe e kiena lepasa, tamän namäreraena make ga pania.

<sup>3</sup> Ana nepisu veve ruru surmal nañani amio ñarina lala, nomäl ñarin tai pupia piakapila na magka tai mëke ea, keviu papisi. Pogos naña ñar magka nene, naga pe na marena ga, ana yar na yomarava la amilan ga naña akila ruru pimi mao sina, ana kila narui apilon kiela sitomena lala apim amlelaga e yar mal nene, ataveve ke naga.

<sup>4</sup> Sanene, la akekaran manene laa surmalí nene, ana pogos naña apisu nopi mla namäreraena pania vena imi märera manene laa, akekaran papisi, amlotun nopi, a amlotun yar mal nene naña sumña sumon la. Apisa sanini, asape “Ane kilia taulu kieta yar mal na kilaen mara nene pogos tai? Nagane pe yar re si tai naña märera manene torokin naga poli.”

<sup>5</sup> Ana pogos naña yar mali nene pimi märera ruru sanene, siar vena kila kiena napiowaena lala. Naga sumña kila ke kiena visena na vilaveena lala, sumña piuel kar ga, a sumña miyumnae ke amio kiena namäreraena viowa, a kila mä pano tol kupario lualima yam vari pa lua [42], sane kas telu komsusa. <sup>6</sup> E pogos nene, naga sumña ñarnena kare Ntewa, piuelin ke kiena kia, a sumña koven ke visena viowa pan peni amio yar wa la naña asike ea. <sup>7</sup> Puriukawa naña amla pania, torokin naga kila mara va va naleлагаena wa lala, vano-o kilia taulu la, a

namāreraena naña naga þar ke na, torokin naña naga ve supēn yolai make ga, yeririna make ga, visena make ga, amio purvanua make ga.<sup>8</sup> Naga kilia ve suþe mā sanene vano-o yar make ga na yomarava nini yoko avatanonia, ana laþasa yoko taþatete avatanonia, a naga nene la ga naña siar e nasiiena yomarava pimi, kiela kia asiriar sike loyumā e tus na malena kienā ne narin sipsip naña amemaria.

<sup>9</sup> Ko naña visae ologe visena la nene, visae kiligamā tomā ga, popon ologe kilale ruruia. <sup>10</sup> Nalelagaena naña vena akusvinaun ga e kienā purvanua vena va yumāe kiela, naga yoko monar va ga narui. A naga naña na teluaen kolmekina e playu na kilaen mara, ee, yoko playu na kilaen mara monar te ga kolmekina narui. Visae pogos mārerera tai sanene, yoko li nalelagaena wa lala monar asumāl mārerera amio kiela sitomena viayavi lala, monar amasisu mā vano-o awar ro ea ava atol luasa.

### *Sur mali viowa na lua, naña molue e porotano*

<sup>11</sup> Ana siraunia nepisu ke sina ga sur mal viowa taþena tai, naga molue e porotano pam. Naga kana lamāliu na þarina lua ga, sa ga narin sipsip tai, ana pogos naña pis, pulgona sa ga nopi naña sumo.

<sup>12</sup> Ana surmal na sumo tamān na lua nena yumāe amio kienā namāreraena mārerera make ga, naga kila mā pano-o yomarava amio kienā yeririna make ga la amlotun surmali na sumo nañpani, naña þar pupia magka na marena ga yoko māo sina. <sup>13</sup> Ana na lua nene asumā akila ke pupia kile lala amio pupia sur na ilanen lala,

pano-o akila tai naña kap molue ke ma e peni pitom e yomarava e maran yar la naña apisu ke ne. <sup>14</sup> Ana e kile la nene naña naga kila ke ne e kia kienā ne sur mal na sumo, naga sumña pisa kotalia ke yeririna na yomarava lala, pere la apa ape wowe laa narui.

Naga pisawal pan la sape ate nono kienā ne surmal nene, naña playu sia ana mal si momña ga. <sup>15</sup> Ana amiyumñaen pae, amla märeraena pan surmali na lua vena kila nono nene kilia yuveve, akilia vis, a amla märeraena pania vena kilia weñmar yar ai naña pe kekaran re vatanon naña lotun nono nene poli.

<sup>16</sup> A amio mëna nanini, naga märeran make la ga vena awe tatu se limala marua, visae peraga, e piamenala. Yaru kar ga lala amio yerkawa lala, a la naña limala korena ga amio la naña limala pule, a yar la naña amiyumñae, amio kiela nasumonena lala, la make ga awar tatu nene. <sup>17</sup> Visae tatu nene ve su re e la, taþatete aul sur tai e yumña na wilwiliena, a taþatete awilwilin sur tai va yar taþena.

Tatu nene naña awe se e la, molue kome kia kienā ne surmali nene, naga marana na kienā kia.

<sup>18</sup> Ko naña oulo tus nini monar omanmarua ruru e yo nene. Visae ovisu kilale make suria, yoko okilia olual marana na kia kienā ne yaru lala, ana apuloviraviran marana na kia na surmali nene, amal tol lualima yam orai pa orai, pona sa naña laþasa asape, orai orai orai [666].

**14**

*Narin Sipsip amio la naña atol manu yam ponotia taaga lualima yam vari pa vari [144,000]*

<sup>1</sup> Nekira ke sina pa yam tai, nomal tavia nae Saeon mēke ga vamon inu, a ma e luasa nomal Narin Sipsip sumal sike ea, naga amio kiena pupia pīna na yeririna tai. La asiri kiena kia amio kia kiena ne arimana Ntewa sike e piamenala, a la moki papīsi, kana marana tol manu yam ponotia taaga lualima yam vari pa vari [144,000].

<sup>2</sup> Ana pupia māagena tai kom ma e peni pitomi, tau lu naña sive pānpo e piame pona polilu tera. Ana nemiagogonia, nemloge ga naña ame kita la amiayelu, <sup>3</sup> a la asumal asike vamon yo wa, e marana ne yar mal la vari nene amio nasumonena lala, amiyaun ke yauena viu tai. La tapena la mokliu naña akekaran yauena nene papīsi, la sinelan mēna asape ayaunia, ana akilayon pelea. La ga naña akilia ayaunia, nane pīna na manu yam ponotia taaga lualima yam vari pa vari nene, naña apul plan la petan yomarava rui. <sup>4</sup> La ke naña pe akilali re piowa amio sira yam tai poli. La apuarar ruru kiela malena mekik ruru po silaga, a ataveve ke Narin Sipsip nene va e yo nape naña naga va ea. Yeririna la mokliu naña asike ne, ana la ke naña apul plan la petan tapena la narui, a la akilala apim sane mras pesa nalaena va Ntewa amio Narin Sipsip.

<sup>5</sup> La nene pe visokanen re tai molue kome logola poli, pe sur viowa re nena tai sike e kiela malena poli.

*Navisi la telu*

<sup>6</sup> Ana e poglis nene, nomāl navisi tai momā kaka ke e yo punu ga ma metava. Amla lologena wo naña ve uro re pania, vena naga kilia va lologon va e yo punu ga va yeririna na yomarava lala, vena va tol purvanua make ga, yolai make ga, a visena make ga. <sup>7</sup> Naga pisawal ke pa e yo punu ga amio pulgona naña keviu, sape “Amiu avatanon Ntewa, avisirlua kiena kia, komin naña kiena aora na lipereen yomarava mālivi rui. Alotun naga naña sii sinapane, yomarava, a sive amio purp̄es nen wii lala.”

<sup>8</sup> Ana siraun na nene, navisi nalua taveve pimi naña naga piovion ke sape “Pupia pulkumali viowa naña Papilon naga mlor rui!

Naga pa mla ntewa naña pe pe leлага re poli, a p̄ere plan yeririna mokliu naña apa ape wowe amio, la sa ga yar na ve torogen ga lala.

Nanagane, pupia pulkumali nene pimi piowa rui amio kiena nono lala.”

<sup>9</sup> A yam si tai, navisi na telu taveve la pimi, pisawal manenea sape “Yoko yar la ve moki naña akinai vena alotun yar mali viowa amio kiena nono, a yoko yar la ve moki naña atamān awe kiena tatu se piamenala pona limala.

**10** Ana yar naña kila sanene, yoko naga mëna ga mun e piala naña pulen kuruta namunena naña melkalka na pupia sine-mimieni kiena ne Ntewa. Yar na sanene, mapulukapi luamene lege kare tasnena e marana navisi wa lala a e marana Narin Sipsip.

**11** Ponoyomé na kiela naloge viowaena yoko molue lue e kapi naña tañatete mare pog tai. La naña amlotun ke Sur mal Viowa, apatanon kiena nono, amio la naña aþar ke tatu na kiena kia e tasnela, la tañatete atol yo wo na va ruru laena, ana yoko ayumæn ga loge viowaena ko legiena a kolemalo nalue ga narui.”

**12** Nakoaena nini naña navisi pisa märera paþisi, ana kana kinasa sape ita li nalelagaena wa lala monar tesumalu märera temio kieta sitomena viayavi. Monar telogear navisaluaena lala kiena ne Ntewa, a silaga monar teve lelaga e Yesu.

**13** Ana nemloge visena tai molue ma e peni, sape “Nanene visena tai naña yoko osirilua, naña sape, siar nagane vano, la naña yoko amare, naña kiela malena su ruru sike e limana Supë rui, yoko awar pupia navisa ruruena.”

Visena nene þisi, ana nemloge Ninuna tamania, sape “Ee, la nene yoko kiela yumæna wo la avam metava amio la, a nagane yoko tañatete si ayumæe narui, la atol kiela navaruruena wo rui.”

*Navisi la telu apito aþar kinanena naña marua e yomaraya nini*

**14** Nekira si pano, ana lul yuwowo tai mēke ga vamon inu, ana nomāl yar tai, sane Narin Yeririna, totano teke e lul nene rui. Totano teke amio karo na p̄arila kiena ne p̄arin sūe lala e p̄arina, nāpa amiyum̄aen e kol, a e limana tarar ke uknaep tai nāpa mal pāpisi vena teen kras nen kinanena lala. **15** Ana navisi tāpēna molue e yum̄a wa, pio ke nāpa teke tano e wos nen lul nene, sape “Poga, osum̄alu, otar kiom̄a playu ova osiar yum̄aena. Kinanena la nāpa sike e yomarava amarmarua rui, nagane pogos na teen narui.” **16** Ana nāpa teke tano e lul sum̄alu, silin kiena playu pa e yo kar ga e yomarava, te kinanena la nāpa marua sike ea.

**17** Ana navisi tāpēna molue e yum̄a wa ma e peni, nāpa naga mēna p̄arar ke kiena playu nāpa pe uk, naga mēna mal na mal. **18** Ana navisi ke sina tai pitomi, naga nāpa pe navisuaren pulukapi, ana naga p̄aro e wonta pimi pio tāpēna nāpa mlarar ke playu, sape “Pogaga, ko mēna ga, pogos nāpa oto okila kiom̄a narui. Otar kiom̄a playu oto owar punu kilis nen kerep la nene teliv e yomarava nini viora, ote polo mras la nāpa marua telan sike e kilisa.”

**19** Ana navisi nāpa mloge, teran kiena playu e yomarava, pito p̄arpolo mras nen kilkerep e yomarava, koven la e lele na winplanen was nela nāpa asike vanua e pulkumali. **20** Ana nasinemimiena kiena ne Ntewa kilapel la ga, pumumu kare la pano-o kuruta mlau p̄arpoyo, mlau pimi keviu sa ga womie, kokonia make

purvanua wetelu merorol pa tol kolmekin yaru,  
pano pano kilamarala plasania.

## 15

### *Navisi olua amio pog viowa maro olua*

<sup>1</sup> Nepisuveve ke sur la ma e peni wa, ana pe yam piavi re poli wa nepisu pupia kile tañena naña pe pupia sur na ilanena pap̄isi, nane navisi la olua, naña la aþar maron pog viowa la olua. La maro sanene komin naña visae la awar ro pae, nane kila sane pupia nasinemimiena kienane Ntewa yoko þisi ruru nenaga. <sup>2</sup> Ana nomñal pupia yotop tai, meri ga pano mñeke na sa ga sive, ana naga kap mñeke ea, ana pila na pila. Ana e lepas nen yo nene, nepisu yar la mokliu asumñal asike ea, a la nene, naga yeririna make la naña ataulu yar tetan, la ataulu kienanamñareraena, a la ataulu puriukawa na marana na tatu naña ame sike ea, naña yar nene þaria sane kienakianowo tai.

La naña atauluia, asumñalu asike amio kiela kita lala naña Ntewa þar pan la, <sup>3</sup> ana asumña ame ke kita la nañani, la asumña amiyaun ke kiela yauena tai naña yauena kienane yar na yumñaena kienane Ntewa naña Navisawalena Mosis, ana nagane pimi naña apio asape yauena kienane Narin Sipsip. Yauena nene pa sanini, sape

“Akee Ata Ntewa na Mareraena  
kiomña yumñaena la akerkeviu pap̄isi, apowo  
pap̄isi, ko ope Parin Suþe kienanog make  
ga, kiomña þelaga la mesmesu a ape lelaga.

<sup>4</sup> Ko ope Suñe, pe yar re nena tai naña ve maraun ko re.

Pe yar re nena tai poli naña ve vatanon re kiomña kia.

Ko ga ope na wa kemua lelaga,  
 ana yolai make ga monar akinai tano alotun ko,  
 komin nagane, sur mesmes la naña ko okila, lala  
 amaliv apim amerarava ruru e kilamaran  
 yeririna na yomarava la rui.”

<sup>5</sup> Pisi na nekira ke sina ga pa loyumña ma e peni ana nomal pulutava na yumña wa lala suwovo ga sike na. Nepisu sane silparpara na tapolen nena nanua sumo akutarar kome yomema pimi, naña amligan ruru navisaluaena kienan ne Ntewa sike ea. <sup>6</sup> Apike pae, ana navisi la olua amolue ea. La amiyen kulmrae urmi la naña amekik ruru po, apilavila, a atelan kulka naña amiyumñaen e kol paro e yerela. Ana amial apim, amio pog viowa olua naña aþar ke ne.

<sup>7</sup> La apim asumal asu narui yar mal la vari tai nene kian piala naña pe kol olua pan la, tai kus tai, tai kus tai, naña apulen ga nasinekar kienan ne kietan Ntewa naña sulue na sike ne.

<sup>8</sup> La akuspae, ana komin pupia naurarena na namareraena kienan ne Ntewa sike e yumña wa nene, kapiu þar punu yo paþisi, kila yar taþatete va loyumña. Ana sumña sanene pano-o tol naña pogos viowa olua kienan ne navisi la olua nene þisi ruru nenaga.

## 16

*Pias nen nasinekar kienan ne Ntewa olua naña  
puleule nenaga*

<sup>1</sup> Ana nemloge visena m̄arera tai molue ma e peni pa pa navisi la olua nene, sape “Nagane, pogos na yum̄ae kiamiuena narui. Ataron plan pias nen nasinekar kienan ne kiamiu Ntewa veve taaga vito e yomarava.”

<sup>2</sup> Pisa pae, ana navisi na sumo pa taron plan kienan piasia pito e porotano, ana kana wii nena mlau pa kila magka wa la molmolue kalo tas nen yeririna la naña am̄e tatu na sur mal viowa sike e yepela, naña la amlotun ke kienan nono, aþar kare magka pano-o þisa amloge sinelalaea pano-o pap̄isi.

<sup>3</sup> Yoko navisi na lua tote taron plan kienan piasia pito e sive, ana kana wii mlau pito tol sive kila pimi pe kuruta sane na yar mare, a sur mal la naña sike ea amarmare make nenaga.

<sup>4</sup> Yoko navisi na telu taron kienan piasia pito e wii lala naña amlau, þarar purþes nen wii lala, ana kana wii mlau pitove kila la m̄ena apim ape kuruta veraga. <sup>5</sup> Ana nemloge visen tai pitomi e navisi nene naña pe þarun ke wii na yomarava lala, naga sape

“Ko na osike m̄a na konua rui, a osike nagane,  
ope Nawa,  
kiom̄a nakoaena la nene am̄arera manene laa,  
ana kiom̄a naliþereena mesmes ga.

<sup>6</sup> Lelaga naña yar na yomarava lala, am̄emom̄ar kiom̄a yar wa lala, akila kuruta na kiom̄a navisawalen la mlau, ana omla maran

ke sina pan la pogaga, naña mala wii namunena ape kuruta make ga.”

<sup>7</sup> A visen tañena si molue mëna e wonta, sape “Ntewa na meta manenea, pe lelaga pañisi, kiomña naliñereena lala amesmes ruru ne-naga, ape lelaga pañisi.”

<sup>8</sup> Yoko navisi na vari taron plan kiena piasa pito e mrae, ana kana wii kila mrae yo pisun manene laa, kilia lege yeririna na yomarava la sane kapi. <sup>9</sup> Ana amloge yepisusun, yepisun kekan la pano-o apiuelin kare kia kiena ne Ntewa pañisi. Akilia ke asape naga mligan ke nakoaena la nene pimi, akilia mä asape naga visae sinenania kilia visaluñaria, ana yepela mavin ga vilon laena, asape tañatete avatanon naga, a tañatete aieluar naga pog tai.

<sup>10</sup> Yoko navisi na lima taron plan kiena piasia pito e pupia lele na totanoena kiena ne sur mal viowa nañani, ana kana wii mlau pito kila lepas wetelu na kiena nasuñenena, yo malolo make nenaga. Yar la amloge piowagan nakoaena nene ñisa, akarar purmenela la pano-o, <sup>11</sup> apiuelin kare Ntewa nae peni komin kiela yepelalaea a kiela magka wa lala, ana apisaluñar ga, asape tañatete nenaga avilopu la e kiela naviowaena.

<sup>12</sup> Yoko, navisi na orai taron plan kiena piasa pito e pupia wii naña mlau, kiena kia Yupretes, ana kana wii nena mlau pito ñartape wii naña mlau ke ne pimi mema nena ga. Nanene kila narui ñarin suñe na purvanua make lala na lepas naña mrae ñarpo yo ke ea, pe kiela mrapa narui,

vena waroen yo ea aimi amio kielia yar na mara lala.

**13** Ana nomāl ninuna viowa telu naña sane prok, naña tai molue e logona pupia arman nōpi, tai molue kome logona Surmal Viowa, a tai molue kome logona navisawalena na visokanena. **14** La telu nene, ninuna ne yermare la telu naña asumña akila ke kile lala, a asumña añaro make puna ñarin supe na purvanua lala na yomarava, aperela apim lele taaga vena akila ruru make suria komin pupia mara naña yoko kapur e pupia legiena maro naña Ntewa na mavapisaar rui. Ntewa pisayu legiena nene rui e kienavisenai tai, naña sape

**15** “Avisuar amiu, yoko nomālivin amiu vinauga, yoko ailan inu sa naña visae yar na vinauenai tai imi.

Yar naña kon ruru kienai sur lala, naga su ruru ke narui, a tavilo ke ga wa, vena sumate inu, vena imimi lua mevano, yoko wo van vañisi.

Ana yoko lañasa ailan sane yepela ve sinas ga akiriri tetai, amawa vañisi e pogos nene.”

**16** Ana nomāl pog na mara na legiena maro pimi ñarpoyo, a ninuna la nene aure ñarin supe na yomarava la ava lele taaga, nane e yo naña visena na Epru sikia sape Amaketen.

**17** Yoko navisi na olua taron plan kienai piasa, ana taron plan ga pitomi metava e yepesinas na mēke ne. Ana visen tai molue kome yo wa

na totanoena loyumña e yumña wa nae ma peni e pogos nene, pion manenea sape  
“Nagane pogos na luas nen sur make ga.”

<sup>18</sup> Ana yekarpla siar e yo punu ga veraga, ñparar kana polilu ne la naþa atera, a navioena lala a mñaagenä lala. A ñparar mñena, pupia yemninu, yemninu mña pano-o pa piowa manene laa sa naþa pe yar tai pisuli re yam tai poli wa, siar e naþa yar mal e yomarava pimi tol nagane. <sup>19</sup> Ana yemninu nene kilapä porotano, kila pulkumali lala na purvanua make ga teliv e yomarava nini piora amloloru, a kila pupia pulkumali naþa Papilon purþa lepas telu.

Ntewa sumña sitomäl ke yo nene, ñparar kienä napiowaena lala, ana kila karepel manene paþisi torokin nena kienä ñelaga naþa kilakila ke ne, kila naga mun e piala naþa pulemamagan kuruta na munena na mñareraena na kienä nasinekar. <sup>20</sup> A ñparar yemninu nene, narin purvanua la apureure apano akokovio, a tavia la nanua asmäl asu ne, amäl la re si poli. <sup>21</sup> Aes yua la meta e sinapane amloloru sane pupia kilavaru lala, a monar yeririna la naþa asike e yomarava. Amloge manene laa piowagania, apisu naþa sur viowa nene mñarera manene laa, pano-o asumña apisalele kare Ntewa.

## 17

### *Sira viowa teke tano e surmal viowa*

<sup>1-2</sup> Ana e pogos nene navisi tai pimi, naga na navisi la olua tai naþa akus ke piawi pias

olua nene. Naga pimi mesmesun in ga, pisawal sape “Otaveve inu. Yoko nekipian ko e pupia pulkumali viowa naña Papilon, naña mēke e naña pupia wii la mlau ke ea. Pulkumali nene miyumāe piowa ga, sa ga sira na mratai. Naga sa ga ñarin supe na purvanua tañena apa akila ke kolau pania, a sa naña māna kuruta na munen kila sitomena kien yeririna na yomarava la apa apiowa laa narui. Ana oimi, yoko nekila ko ovisu ya naña yoko imi mālivinia e pogos naña yoko naga war ruru kiena nakoaena napo.”

<sup>3</sup> Ana navisi nañani pimi ñerelua ninuu, mligan inu nesike e yomema tai. Ana nepisu sira tai totano teke meta e purwolu na puluk tai. Sur mal nene pivaga make ga, naga ñarina olua, a kana lamaliu lala tol lualima, a e yepen make ga asiri kia viowa lala navisalelekareen Ntewa. <sup>4</sup> A sira nañani, naga miyowau pañisi e kulsota la naña amemaena a apivaga, a apaia kare yepena lala e mrakotal lala, a e piataliga lala, a e sur la naña pe kol, a e kilavaru la naña merarava po naña kana kilavaru ne pa metava pañisi, amio sur la naña asike loyumā e mratamelilivi. Naga mlarar ke piala tai naña pe kol, a piala nene pulen ga kiena ñelaga viowa lala amio kiena kolau. <sup>5</sup> Asiri visena tai sike e piamenana, pe visen wan ga tai, visena nañani naga sane kia tai, naña pisa sanini, sape

“Papilon naña keviu,  
anenane sira na mratai lala,  
purp̄es nen ñelaga la naña ape kororaki e yomarava.”

<sup>6</sup> Nepisu manene mā sira nene sanene, nepisu kilale sane mun wii ana maran telivi, a pe komin re naña mun kuruta na munena poli, ana komin naga mun ke kuruta kana li na lelagaena wa lala, nane la naña amñemomär la komin naña ataveve Yesu. Nepisu sira naña sanene narui, yepeu ñili na ñili!

<sup>7</sup> Ana navisi pisa pan inu, sape “E, ya ne kila omila manene sanene? Osuwa, yoko nevisa meraravan van ko na wa. Sira nene, ñparar purwolu puluk naña teke e wos nena, a ñparar ñparina olua a kana lamāliu lualima, suri la nene kala kinasia sumā ga, a yoko nekila ovisu kilale ne.

<sup>8</sup> “Purwolu puluk naña opisu ne, naga mēke kemua nakonua rui, ana naga pe su re si nagane poli. Ana e pog tai naña pimi ke ga wa, yoko molue si vetan puls naña mēke e nagane, yoko vanon marþanun kieno nakoae. Ana e pogos nene, yoko yeririna na yomarava la naña asike ga wa, yoko avisu purwolu nañpane. Nane la naña siar e nassiena yomarava pimi, kiela kia pe su re e Tus na Malena poli. Pog naña avisuia, ailan vapisi, komin akilia asape naga sike kemua na konua rui, yoko pe su manene re si yam piavi poli, ana siraunia, naga molue sina. <sup>9</sup> A yar naña pe manmarua ruru po, yoko naga kilia visu kilale ruru kinas nen sur la naña yoko nevisa.

“Nasumo, ñparina la olua. Kana kinasa, pisa pulkumali tai naña sira nene pe supenia, kunus olua sike ea. A kunus la nene, la mēna kala kinas sumā ga, naña sape pupia ñparin supē la olua

asumā ga. <sup>10</sup> Tol nagane, ūparin supe la lima nene apis rui, a tai sumal sike nanagane. Tai mēna ga pe mālivi re poli wa, sike ga wa, a pog naþa imi, yoko su tote laa ve piavi na wa.

<sup>11</sup> “Ana purwolu puluk mēna, naþa sup̄es nanua a nagane pe mon re si poli, nanua sumo naga mēna ūparin supe la olua nene tai. Naga la ke tai narui, ana yoko wasupe sina sane ūparin supe na orelu tai. Naga pe yerkawa sanene, ana pe sur koren ga, komin yoko naga mēna p̄isi, va war kiena nakoaena mārera.

<sup>12</sup> “Sur taþena na vike meraravanena, nane lamaliu la lualima naþani. Nanene kala kinasia nane ūparin supe si lualima. La nene pe asumal re poli wa vena ave sup̄en kiela lepas lala, ana yoko akila ga kiela yum̄aen la na wa e pogos na purwolu nene sumalu. Yoko ave sup̄en pae yomarava nini amio, ana nane naga pe na yam plas ga, sa ga aora taaga.

<sup>13</sup> “La lualima naþani, la taþatete akila kiela yum̄aena lala, ana la ape nakilaen ga yum̄aen kiena purwolu puluk nene, vena kiela nam̄areraena iila naga, vena kila naga imi ve keviu la sane. <sup>14</sup> Yoko la punu nene aim veraga vena akilali mara amio Narin Sipsip, ana taþatete atauluia. Peraga, ana yoko naga taulu la, komin naga ke narui naga pe supe kien supe lala, naga pe ūparin supe kien ūparin supe lala, a kiena yeririna nowo lala, nane la naþa naga pio la, naga mligan plan la, a la nane ave lelaga e naga.

<sup>15</sup> “Sur navisa meraravanena taþena, naga wii lala amio sive lala naþa opisu sira viowa nene

naña towar la ke ne. Kala kinasa, naga yeririna la naña asike e yomarava, amio yolai lala, a purvanua lala, a visena lala.

<sup>16</sup> “Ana siraunia, purwolu puluk nene amio kana lamñaliu lualima, yoko yepel mavin sira viowa nañpani. Yoko asumñalu akila imi viowa van vañpsi, naña ayen plan mña kulsota lala ve plamomë e maran yar lala, a yoko akan make kana kilarñiu lala ana okoven kana puriu lala vito kapi kekania.

<sup>17</sup> “E mrapa ne nanene naña yoko akila va sira nene, tepisu sane torokin nena nakoena naña Ntewa pisawal e kiena visen tai nanua sumo rui, sinenan sape sira nene monar waria. Naga ga mligan e kiela sitomena lala amio purwolu puluk nene, vena akila sanene vania.”

<sup>18</sup> Ana navisi nañpani kila make kiena visena e poglis nene, sape “Nane navisa meraravanen sira nene narui, naña naga pupia pulkumali naña pe supen ñarin supe tañena lala e yomarava.”

## 18

### *Pulkumali viowa naña Papilon mloru*

<sup>1</sup> Yoko, nepisu navisi tañena molue ma e peni pitomi tano. Naga pe navisi mñarera tai kiena ne Ntewa, pitomi ñarar pupia namñareraena, a kana nategoliema kila yomarava pilavila. <sup>2</sup> Naga pio e pupia pulgo tai naña pisawal sape “Papia pulkumali viowa naña Papilon, mloru rui.

Nagane, yo nene pimi pe umā tai māna yermare  
lala a pe yo tai naña ninuna viowa la  
atapolou ea.

Manu make ga naña akila ke ūelaga na kororak  
viowa lala, la mēna amē māla ponovi sike  
ea.

<sup>3</sup> Naga pa ūere ntewa la naña pe ape lelaga  
re poli, a ūere yeririna tañena la apa  
ape wowe amio, la sa ga yar la naña  
amun wii ūarila telivi. Sa ga naña naga  
pa ūere ūarin supē na purvanua tañena  
lala, apa akila kolau amio, a yar la naña  
amiyumāen ke kilavaru e yomarava telivi  
piora, la ataulu kilavaru namname pañisi  
e yumāena viowa lala na pulkumali nene,  
pano pano-o apim ape yar na sur moki  
manene laa.”

<sup>4</sup> Navisi pisayu sanene ūisi, ana nemloge visen  
tañena kom ma e peni pitomi, pisa sanini, sape  
“Kiau yeririna lala, o! Popon aurmatan yo nini  
vilaga,

visae peraga, naga warar amiu ava e kiena  
mlamulena viowa lala,

visae peraga, naga warar amiu mēna ava e kiena  
nakoaena lala.

<sup>5</sup> Kiena mlamulena viowa lala ponpolo māga  
pa tol ma e peni, a Ntewa tañatete sinen  
ŵesan naña naga kilaroro kiena navisalu-  
aena yam via.

<sup>6</sup> Popon ga naña alamaran si naloge viowaena  
vania sa naña naga kila pa yar tañena lala,  
popon aul maran vania va yam ve lua e ya naña  
naga kila rui.

Wii melkalka naña naga kila yar tañena la amunia, popon akokonia ruru mñana piala ulemamaga.

<sup>7</sup> Nanua, kiena nalogewoena e kiena malena meme ga, naga keviu pañisi, ana yoko vilon imi ve naloge viowaena e yepe lalaea lala amio tagiena lala.

Ana nanene na pere ke na wa, komin naga pilaven ke kiena sitomena na wa, sumña pisa ke pania, sape ‘Ke, in na nepe ñarin suñe sira sanene, neto ruru na neteke ne. Sur make ga po manene laa pan inu, ana tañatete nena neve sa letano tai naña pe kiena sur re poli, tañatete nena netagin naloge viowaena pogos tai.’

<sup>8</sup> Ana naga, e legiena ta ne pimi ke ne, yoko sur viowa la kila kare ruru naga veraga. Yoko marena, warar tagiena, amio viso, a yoko kapi kekalele kare naga.

Naga pe sitom re sur poli, ana Suñe Ntewa naña yoko liñere naga, kiena namñareraena naga keviu manene laa.”

<sup>9</sup> Ana navisi pisa sanini, sape “Parin suñe make ga na yomarava nini telivi piora, la naña apa amlotun ke ntewa lala na pupia kumali nene, yoko avisu kilale naña naga mlor rui. La ke narui naña sane apa akila ke kolau amio, apa amloge po amio naga e kiena malena wo pano-o, pe asitom re nena sur tai.

“Ana pogos naña mloru, kana kap la naña kekan ke ne piuyu pa metava, nanene narui yoko sinela viowagan vapisi, yoko ataginia. <sup>10</sup> Yoko avisu nakoaena la naña naga sumña ñaria, yoko

kila la m̄ena asiar ayuyuwawa. Yoko asu la gar perina akira avisusuia, avisave  
 ‘Ake, pupia P̄apilon, pulkumali nam̄areraena,  
 sinemimi miye ko pañisi.

Lelaga nañane, osu ruru m̄a pano-o,  
 ana e aora taaga ga nene om̄al kiom̄a luasa,  
 omloru, op̄isi nenaga.’ ”

<sup>11</sup> A ñparar m̄ena, yar na stoa lala e yomarava wetelu yoko atagi a sinela yea, komin nañpa pe yar na ulen re si kiela sur la poli. <sup>12</sup> Nanua sumo, akila kiela waa lala pulen ga tegaki nowo lala, sane sur la nañpa amiyum̄aen e kol ñparar selpa, amio kilavaru na kupito nañpa pupia kilavaru, amio sur nañpa sike e mrakiav, a kulmrae la nañpa kala marala la powo, a lak la nañpa ponotaninu, a sur la nañpa amiyum̄aen e maluen elepen, pona e lak lala, pona e pototo lala, pona e kilavaru lala, ana nagane, kiela yum̄aena na tauluen kilavaru la nene apim amlolor make ga. <sup>13</sup> A e legien nene, yoko yar la ve aul re si sur na kilaen kinanen lala, sa nañpa m̄aki lala, ñparar mrasil lala, pona yago lala, puluyavi na kilaen kilaparavi amio kona lala, ñparar m̄ena sur na munen lala sane kuruta na munena. Yoko yar ve ul re si sur la ne sane ponotaninu a sirveve na mras nen olip, a sur na tauluen kilavaru la ea sa nanua sumo, sane puluk, sipsip, wosi ñparar kana sur nañpa ñperewerea. Lañasa nanua sumo apuliwilin yar lala apim amiyum̄ae korena ga pan yerkawa la sane, yoko ve akila re si narui, komin pogos nañpa pupia pulkumali nene mloru, yoko yum̄aena

toko narui, ana yar tāpatete si taulu kilavaru na visuaren kiena malena.

<sup>14</sup> E pogos nene narui, yoko avisayu yo nene, avisave

“Ko sinomān osape owar mrasnomā la nāpa ve kerkeviu ve moki, ana naga pe marua re poli wa, kekapil make rui.

Nanua, ko na lumomā pule ruru nenaga, kiomā sur la punu ga po tanea pāpisi wa, ana nagane kokovio make nenaga, tāpatete nena yar tai visu si sur wo tai e ko narui.”

<sup>15</sup> A yar na wilwilinen sur la nene, nāpa la ataulu kilavaru la mok li e rui, yoko asumāl ga asike perina akira vano, ailania a amaraun nakoaena nāpa pupia pulkumali nene sumā pāria. Yoko sinela ye vano-o vāpisi, <sup>16</sup> yoko atagin vāpisi, avisave

“Ake, pupia kiamimi pulkumali, mesitom ko pāpisi wa.

Nanua sumo ko na omyowau ruru po pāpisi wa, ōpar kotal a na kolmekimā la nāpa pe kol piataliga la pār punu yepemā lala, ana nagane na ko na peraga narui, kap mare.

<sup>17</sup> Sanapen na kiomā pupia sur mok la nene kovio ga e narin aora taaga ga sanene?”

A yar lala na uararen ūeligas nen waa la nāpa nanua āparwar ke tegaki lala, pār ar kiela yar na yumāena lala, amio la nāpa akomkom ke e waa, pona ataulu kilavaru e sive, la mēna asumāl ga asike perina apisu manene ke yo nāpani.

<sup>18</sup> Pogos nāpa kana kap ne la piu, pa ke ma e sinapane, yoko avisasa yo nene avisave

“Lelaga o, pulkumali nene na yo ta nene nāpane,

e yomerava nini yo tai pe sa re si nene poli.”

<sup>19</sup> La asitom sanene, a amloge piowa, akoven kare posnoyavi e ūparila ūpisa, atagi, asape “Ake, kiamimi pupia pulkumali, piowa pan ko papisi wa.

Ko na opulen ga kilavaru, ana memiyumāe e kiamimi waa lala, moþpar kiomā tegaki lala, pano pano-o imimi mēna ga momāl kilavaru naþa miila imimi, ana nagane piowa narui.

E pogos plas ga nene, ana opim ope yo na kovioena ga.”

<sup>20</sup> Ana pogos naþa pupia yo viowa nene mloru sanene, visena tai molue kom ma e peni, sape “Ma e peni, pupia kekarena a logewoena.

Amiu naleлагаena wa lala, a nalologena lala a navisawalena kiena ne Ntewa, amiu akilia aieluar naga vapisi, komin naga mliþere sira viowa nene rui, kila maran si pania komin napiowaena la naþa kila pan amiu nanua.”

<sup>21</sup> Ana e pogos nene, navisi tai pimi kawelua pupia kilavaru tai, kusyaun pa metavan ūparina koven pito kopo sive, talilu pito kovio. Siraunia navisi naþani pisa sanini, sape

“Pupia pulkumali viowa naþa Papilon nanene narui, yoko akoven lua va ve sanene, akila naga loru vena tapatete si kilia sumālu pog tai.

<sup>22</sup> A ko Papilon, visena na van ko sanini, sape yauena veraga amio yuka lala, yoko tapatete yar tai loge si e ko,

yar na kilaen yumñaena lala, yoko taþatete si tai  
se ko pogos tai,  
a yoko ve mñaagena na vilien re si kinanena lala.  
<sup>23</sup> Yomerarava na kapi vivaga lala taþatete si  
tegoli kiomña yo lala,  
a yoko taþatete si ologe visena na kekarena kiena  
mÑee amio sira mÑee naþa atalopa mare ga  
na wa.  
Yar na kilaen kiomña kilavaru lala, e yomarava  
nini pe tai torokin la re poli,  
a namñareraena kiena ne kiomña kimi lala a  
kiomña navisokanena ga lala kila opere  
sitomena kiena purvanua taþena lala apa  
ape wowe.”

<sup>24</sup> Nane tepisu naþa Papilon nene, naga pe yo  
tai naþa pe purþes nen napiowaena manenea.  
Navisawalena ai pona naleлагаena wa pona yar  
taþena naþa amemar la komin naþa ape kiena  
ne Ntewa, ana kala kuruta la mlau e porotano na  
pulkumali nena, naga ke nene narui, naþa kila  
naliþereena a nakoaena kiena ne Ntewa mloru  
ea mÑarera manene paþisi.

## 19

### *Pupia kekarena ma metava komin naþa ma e peni taulu make suria*

<sup>1</sup> Siraun naga nene, nemloge pupia þina ma e  
peni apion manenea, asape

“Potena pan kieta Ntewa!

Tamaliaena, urarena a mÑareraena naga taaga ga  
kiena.

<sup>2</sup> Kiena naliþereena make ga ape lelaga a  
amesmesu paþisi.

Sira na mrapa la nene anela naga piowa ga,  
 kielā na kolauena la akila yomarava pimi pe  
 kororaki pañisi, ana Ntewa mliñere naga  
 rui.

Ana naga mla pupia nakoaena tai pania komin  
 kuruta kana kienā yar na yumāena la  
 naña mlaū.”

<sup>3</sup> Asumā amlolokai mā sanene, ana asikol ke  
 sina ga, asape

“Potena pa Ntewa! Kapi kekan ke kororaki la  
 nene rui, yoko kana kapi nena viu lue ga  
 va metava narui.”

<sup>4</sup> Ana nasumonena la lualima yam lua pa vari  
 [24] amio sur mali la vari akinai e marana ne  
 Ntewa naña totano teke meta e kienā yo wa, ana  
 amlotun ke naga. Apionia, asape  
 “Po pañisi! Potena pan keviu!”

<sup>5</sup> A visen tai molue mēna e yo wa nañani, pisa  
 sanini sape

“Kam na yar na kilaen yumāena kienā ne Ntewa,  
 amiu yerkawa lala a yeririna kar ga lala,  
 kam make ga naña amlogear naga,  
 nagane kana pog nena napo naieluarena.”

<sup>6</sup> Ana nemloge sina pupia ñina naña pio naña  
 kielā māagena sa naña sive ñanpoia mumu, sane  
 polilu. La asape  
 “Potena pania!

Kieta Suñe Ntewa na Mava, naga taulu make sur  
 rui!

<sup>7</sup> Teieluar naga,  
 tevisirlua kienā kia, tekekarania.

Nagane pog wo na kilaen ñapagena na talopaena  
 kienā narin sipsip narui.

Wona na sira paia ruru naga su ruru ga sike na,  
<sup>8</sup> a amiyowauia ruru naga e kulmrae viu wo lala,  
 apowo a amerarava pāpisi.”

Ana kulmrae nowo nāpa miyuwowo ne nāpa  
 wona narin sipsip na sira miyenia, naga kana  
 kinas tor̄na ga, kana kinasa sane yum̄aena wo la  
 nāpa naleлагаena wa lala kiena ne Ntewa la akila  
 rui.

<sup>9</sup> Ana navisi nāpa sike amio inu e pogos nene  
 pis pan inu, sape

“Yoko nevisa kiom̄a visena tai vena osirilua e  
 kiom̄a tus nene. Visena sanini, sane yar  
 nāpa yoko avio naga vena naga m̄ena va e  
 kinanena na p̄apagena na talopaena kiena  
 Narin Sipsip, yoko naga loge wo na wo  
 vapisi.”

A sikol sina visena nene, sape

“Naga visena lelaga tai kiena ne Ntewa nāpa pe  
 lelaga pāpisi.”

<sup>10</sup> Ana nemloge naga pisa sanene pan inu,  
 nekinai pania, nesape nelotunia, ana naga  
 pisalūparia. Pisape “Toko, ve okila re sanene van  
 inu! Monar olotun ga Ntewa naga taaga. In na  
 nepe kiena yar na yum̄aena ga, sane ko, a sa  
 m̄ena wolai tāpēna la nāpa apiawa m̄arera ke e  
 visena lelaga lala kiena ne Yesu. A po pāpisi nāpa  
 amiut̄a akila ke sanene, komin nāpa pur̄p̄es  
 nen kinas nen navisawalena lelaga make ga nāpa  
 apisawal nanua pimi, naga Yesu ga ne, amio  
 kiena visena lelaga la nāpa apuarar ke m̄arera.”

*Yar m̄arera nāpa kus wosi na miyuwowo*

**11** Ana e pogos nene, ma e peni pietava pan inu, nekira pa loyumña, nepisu wosi yuwowo tai naña po pañisi sumñalar ga sike na, a yar märera tai naña kusa totano teke ea. Naga ke narui naña kila mara suwo napiowaena, pona pogos naña kila kienanaliñereena, ana naga miyumæe nena mesmes papñisi. Yar nena, apio kienan kia asape Parin Supe Lelaga Naviawaena. **12** Ana kienan kia tañena mëna tai asiri sike ea pe yar tai kilia re kana kinas poli, naga taaga manene kilia. Kilamarana pilavila sane kap naña pivaga, a e ñarina miyen ke karo na ñarila kienan ne ñarin supe lala. **13** Naga miyen mëna mëna kulkota viavi tai naña aputon pito e kuruta vena kila ve maran la ea, ana naga kienan kia si tai na naña asumña apio naga ea, naga sanini, asape Visena Wa kienan ne Ntewa.

**14** Ana e pogos nene, ñegas nen yar na mara lala nae ma e peni, amiyowau ruruia e kulmrae yuwowo a akus kiela wosi yuwowo lala, asumña ataveve ke kiela nasumonena nene apano. **15** Naga ñere la apano, kienan visena molue ke kome gona sane playu na mara naña mal ga lepas luwoka, naña yoko te plan purvanua na yomarava la akekapil. A siraun naña yoko naga taulu la, yoko naga sumñalu ve supen la, a naga ñuarar ke plaki e limana, pototo tai naña urmi. Nakoaena märera ya naña sinemimiena kienan ne Ntewa na mavaligan va yar la akusia, ana yerkawa ne nanene narui yoko naga war imi mälivi.

**16** Ana naga kiena kia taþena sike ga wa, naþa asiri e mña kulkota a e lana, sape  
“Parin Suþe kiena ne þarin suþe lala, Yerkawa kiena ne yerkawa lala.”

**17** Nepisu navisi tai sumalar sike na naþa yepisun tegolia, naga pion pa manu lala naþa akaka ke metava ne, sape “Ei, kam punu ga aim lele taaga e pupia þaþagena kiena ne Ntewa.

**18** Kam manu na kanen tata lala, yoko ve ve piavi re ayumñaen kinanena tai torokin amiu nenaga, naþa tas nen yar mare lala kiena ne nasinekar kiena ne Ntewa. Parin suþe lala, pupia yerkawa na mara lala, yar märera lala, wosi na mara lala, amio la naþa aþerela ke ne, amio yeririna kar ga lala la naþa ape yerkawa pona ape yar ve torokaki na yumñaena ga lala, la make ga asumalu vena akila mara va Ntewa, ana naga tau lu la kila momar la pa ke ne.”

**19** Ana nepisu surmal viowa amio þarin suþe na yomarava amio kiela þegas na kilaen mara lala, apim amiyuwon vain la ke lele taaga. A sinelan asape akila mara amio naþa kus ke wosi yuwowo ne amio kiena yar na kilaen mara lala.

**20** Ana asape akila mara narui, ana yar viowa lala amilan ga naþa lepas kiena ne Ntewa asumal veraga apa atarar kiela na sumonen luwoka naþa atarar ruru la nenaga, nane sur mal viowa amio navisawalena naþa pisosokan ga ne na pe yar naiilaena e kimi lala a sur nailanena lala. Sumo, naga miyumñaen sur la nene pisa kotalia ruru nena yar lala naþa þere kiela sitomena

pano atamān amē tatu na sur mal viowa pa e piamenala, apa amlot wowe pa kienanono.

Ana la atarar ruru nena nasumon-ena luwoka na ūegas viowa nene, ana akuwanpran luwoka pito e pulukapi naña mumu ke ne.

<sup>21</sup> Ana tařena la pe akila re mara poli wa, amilan ga playu na mara tai molue kome gona naña kus ke wosi yuwowo ne, pa sanene, pa sanene, te momar kare la amarmar pa ke ne. Ana taveve ya naña nepisuia, manu na kanen kilam̄iu lala apim atewowa tas nen marena la nařani, akan pano-o meřela la puleule.

## 20

### *Apiar Yermare pa tol kas manu taaga [1000]*

<sup>1</sup> Ana nepisu navisi tai molue ma e peni pitomi tano, mlarar ke ki tai e limana, ki na pulutava na pulus nen marena naña pito na pitove pe luas re poli, a amio ki nena, ūparar m̄ena sen m̄arera tai. <sup>2</sup> Ana naga ūpere mesmesun pupia nopi nene, naña pe yermarua lom̄ara naña Yermare naña Yermare Lego, pa tarar ruru m̄arera, piar ruruia e sen, pisaar sape yoko mon m̄a sanene va tol kas manu ve taaga. <sup>3</sup> Ana kutarar naga amio kana sen nařani koven pito e pupia pulus naña pito manene tano ne, ana kotawea, kiar ruru m̄eke ea, vena yar viowa nene ve va re si kilali yeririna lala na purvanua wetelu, va tol naña kas manu ve taaga nene warovia. A kienam̄areraena tařatete ūpsi make na wa, komin naña siraunia, e narin pogos tai ve plas ga, yoko naga kilia molue vena kila ke sina ga ūparina yam tai.

<sup>4</sup> Ana nepisu yo wa lala, amio la naña atotano ateke e wos nela, naga la naña apisir plan la rui vena akilia aliñere yar lala. A nepisu mëna ninun yar la moki naña asumña ga amio la, nane yar ñes la naña amlologon Yesu amio visena wa kiena ne Ntewa, ana ateroro kolmekilania. La nene pe amlotun re sur mal viowa nene poli, pe akinain re kiena wonta poli, a pe aþar re kiena tatu e piamenala poli, pona e limala, ana Ntewa kekaran la, kila la amal sina vena akilia asumñal amio Kristo vena avisuar yo punu ga va tol luas nen kas manu ve taaga nañpani.

<sup>5</sup> Naña amal si sanene, naga pogos ñesia naña yeririna lala amal si petan marena, ana la ga nene atolia. Taþena lala naña amare ga asike na wa e pogos nene, la nene yoko atol ga kiela malena na wa e kana nalua nena, nane e luas nen kas na manu taaga nene. <sup>6</sup> Navisa ruruena wo kiena ne Ntewa sike e la naña amal ñes sina vetan marena nene, naña la na kiela malena pe wa ruruia. Marena na lua taþatete nena tol la, ana yoko la ayumñae sane la ape yar wa kiena ne Ntewa, ape yar wa kiena Kristo, a yoko naga visir plan la avisuar yo amio naga e kas manu ve taaga nene.

### *Yermare, kana luas*

<sup>7</sup> Ana pogos naña kas manu ve taaga nene ñisi pae, yoko Yermare kilia molue sina e lele nakoaena naña sike ea. <sup>8</sup> E pogos nene, yoko naga va kar ga e purvanua punu ga e yomarava nini, visa kotalia si yar lala, a yoko naga werepran pupia ñegas lua nene aim ve taaga,

nane yer Koko lala amio yer Makoko lala, vena aim si ave taaga vena akila mara va yeririna lala kiena ne Ntewa. A visae ūegas lua nene aimi ave taaga, la ave moki na ave moki, sane mras nen none la garo losi.

<sup>9</sup> Ana apureviraviran ruru la sa naña li na kilaen mara lala, amial vera ga akusro yomarava apim atol yo Yerusalem, yo naña Ntewa kekaran pañisi, naña naga yo kiena ne kiena yeririna la naña asike ea. Ana amievivi ruru nena pupia pulkumali nañani, asape sinelan siaren mara narui. Ana amilan ga pupia kap tai molue veraga kom ma e peni pitomin la, kekan la pano-o kekan make la nena ga. <sup>10</sup> A Yermare, naña naga pisa kotalia la sumo rui, akoven lua naga pa e pupia pulukapi naña momu ke ne, nane kapi mā nena naña akoven surmali viowa amio navisawalena navisokanena lalua apa asike e rui. Ana la telu nene yoko akus naloge viowaena e yo nene ko legien a kolemalo, vano vano-o ve uro re.

### *Naliñereena maro kiena ne la naña pe amle-laga re poli*

<sup>11</sup> Ana nepisu pupia yo na liñereen yar lala, naña miyuwowo na miyuwowo, amio suñe keviu naliñereen yar lala totano teke metava ea. Kiena naurarena kokonia ruru make yo nene, kila porotano amio sinapane la luwoka aþpure apevenin plan la apano akovio. <sup>12</sup> Ana nepisu pupia ūegas nen yar la tai, naga yar la naña amare nanua rui e yomarava, pupia yerkawa lala a yar kar make ga lala. Ana apim amalivi e nañani vena asumal ase marana ne suñe keviu

naliþereen yaru. Nepisu tus laþas pike ða sumña ga, ana apa akus ke sina taþena, naga asape Tus na Malena, ana naga mëna apike. Ana apisu vevea asape alual ya naþa asiriyu sike e tus nene e lepas kiena ne yar mare la nene, ana la peve taaga akus kiela nakoaena taveve tus la nene. <sup>13</sup> A yar mare la nene, amio mëna la naþa amarmare asike e sive, amio mëna la naþa amare apa asike e yo nalogeen viowa rui, la make ga aimin si naþa alip̄erela taveve kiela yuþaena lala.

<sup>14</sup> Ana amliþere yar mare la nene pano-o ðisi, asumðalu akus sur lua nene naþa marena amio mëna yo nalogeena viowa nene, ana akovenpran ga luwoka veraga vito e pulukapi. Ana marena naþa yaru la atol e yo nene, naga asape marena na lua. <sup>15</sup> A a si naþa pe amal re kiena kia sike e Tus na Malena poli, naga ke narui akoven mëna naga vito e pupia pulukapi.

## 21

### *Pulkumali viu naþa Yerusalem*

<sup>1</sup> Ana siraun nene, nepisu peni viu amio yomarava viu amalivi, komin peni nasumo amio yomarava nasumo amio kana porotano lala a kana sive nena, akokovio make nena rui. <sup>2</sup> A nepisu pulkumali wa wo nene, Yerusalem viu, molue kom puna ne Ntewa ma e peni pitomi tano e yomarava. Nepisu naþa apaia ruru po wa, sane sira tai naþa amiyowauia po paþisi imin vena akila talopa amio wona.

**3** A e pogos nene nemloge visena wo tai molue ma e peni, pisawal sanini, sape

“Nagane, Ntewa sinenan sape sike amio yeririna lala na yomarava, sinenan sape kila māna umā sike pu la.

Yoko aim ave kiena yeririna lala, komin napā yoko naga amio la lue narui, yoko naga imi ve kiela Ntewa lelaga.

**4** Wamarala make ga, yoko naga yumuplania, yoko marena pona tagena pona yepelalaena pona naloge viowaena, la nene peraga narui, komin napā pogos marua nakonua la ūparo pano pa kovio rui.”

**5** Visena nene ūpisi, ana yar wa napā totano teke metava pisawalia, sape

“Ee, lelaga papisi ūpan wa! Yoko in na nekila make sur la imi ve urviusina!”

A naga sikol ke sina ga pisawal nena pan inu, sape

“Nanini yoko nevisa visen tai van ko napā pe lelaga nena napo, napā okilia owasine ruru nenaga, a popon osirilua.”

**6** Ana naga pis mā ga, sape

“Kiau yūmaena make ga, nekila punu ruru nena ga!

In na in ūpesia a in maro, in na nasiarena a naluasia.

Yar napā loge moto karia, yoko nevio māna wii tai e purpēs nen wii na malena, nela vania mun korenan ga sanene.

**7** Yaru napā kiena malena ūparo e pog mārera lala, sumāl mārera sumā vano-o taulu viowaena, yoko naga tol navisa ruruena

lala sane kiena lalimana. Yoko nesumña  
neve kiena ne Ntewa kemua lelaga, yoko  
noure naga imi ve naruu.

<sup>8</sup> Ana yar viowa lala, la m̄ena yoko atol kiela  
lalimana lala. Nane yar sur la naña pe  
apiawa re m̄arera e in poli, naña pe am-  
lelaga re poli, kiela p̄elaga piyowa pap̄isi,  
am̄em̄ar yar tañena, akila piowa amio sira  
pona yerm̄ene, aþar kimi, amlotun nono,  
ape yar navisokanena. La ke nene narui  
yoko ava atol marena na lua, nane e lelela  
ke napo narui, nane pulukapi naña pe  
ponoyom̄e, naña m̄ewo p̄ele ga.”

<sup>9</sup> Visena nene nane p̄isi ne, ana navisi nasumo  
la olua nene lala tai, naña aþar pias nen sur olua  
na loge viowaena maro la olua na yomerava,  
pimi pio inu. Sape “Oim ke ne sumo wa,  
yoko nekila ovisu sira va talopa, nanene wona  
Narin Sipsip.” <sup>10</sup> Ana p̄erelua inu nepa ga e  
ninuu, ana imimi lua mepa metol pupia tavia  
tai metava. Imimi lua mesumñalu mese yo nene  
narui, kipian inu e pupia pulkumali wa naña  
Yerusalem, nepisu sina nom̄al naña molue ma  
puna ne Ntewa ma e peni pitomi ke tano.

<sup>11</sup> Pitomi ke sanene narui, naurarena kiena ne  
Ntewa sumña puleule, kila tego pap̄isi, sa naña sur  
tai naña pilavila ruru po pañisi. <sup>12</sup> A kana pupia  
kove nena miyervivi nenaga, pa metava na pa  
metava, a pupia pulutava lualima yam taaga pa  
lua [12] sike ea, naña kana navisi la peve taaga  
apisuar ruru la m̄aga. A pulutava la make ga,  
tai kia sike ea, tai kia sike ea, naña kia kiena  
ne lus nae Israel la lualima yam taaga pa lua,

<sup>13</sup> naña pulutava telu sike lepas na lagawa, telu sike lepas na lagi pasipuruia, telu sike lepas na mrae molue ea, a telu sike lepas na mrae pito tano ea. <sup>14</sup> A pupia kove nena sumalu sike e kana pupia kemrapē nena tol lualima yam taaga pa lua, asiri kia sike e peve taaga, naña kia la nene kienā nalologena la lualima yam taaga pa lua kienā narin sipsip.

<sup>15</sup> Ana navisi naña imimi lua mesun ke ne, naga kus ke natotou viavi tai naña kol e limana, vena va lual totou na pulkumali nene keviu sanape, amio kana kove nena a kana mratava lala. <sup>16</sup> Kove na pulkumali nene, lepas varoka piavi maran taaga, ana navisi pa mla kana totou nena, taulu tasme manu lua [2000]. A mla mēna totou na yepasia siar tano pa tol metava, maran taaga ke sina ga e kana lepas la vari nene. <sup>17</sup> Pisi na pa pisu kana kove, mla totou na kana merorol nena, polo kana merpu ne lala pa taulu nena lualima yam orai [60] veraga. <sup>18</sup> A kove nene pe amiyumāen re e kilavaru kar ga la poli, ana miyumāen e kilavaru tai naña kana marana la po papisi, a pulkumali yepas make ga lala amiyumāen ga e kol, mekiki po na po, pilavila po na po papisi. <sup>19</sup> A pupia kana kemrapē na kove nena, la mēna ga apaia ruru la amio kilavaru la naña powo, naña tai amiyowa e kana kilavaru naña maran taaga sanene, tai mēna amiyowa e kana kilavaru naña maran taaga sa ke ga, pano pano-o tol make kana kemrapē lualima yam taaga pa lua nene. A kia kienā ne kilavaru lualima yam taaga pa

lua la nene, sanini. Nasumo, kienā kia saspa, na  
lua kienā kia sapāia, na telu, naga kalseton, na  
vari naga emrol,<sup>20</sup> na lima naga satonik, na orai  
naga kanelion, na olua naga krisolaet, na orelu  
naga perol, na ovarī naga topas, na lualima naga  
krisopres, na lualima yam taaga pa taaga naga  
sasin, a na maro naña lualima yam taaga pa lua  
naga ametis.

<sup>21</sup> A kana mratava lala, la make peve taaga  
ape pupia perel peve taaga. Ana nepisu mēna  
pupia mrapa na pulkumali nene, naña naga  
amiyumāen make nena e kol, po na po, pilavila  
pañsi.

<sup>22</sup> Ana sur tai naña nemilania, nomape yoko  
nelual pupia yumā wa tai mēke likan pulkumali  
wa nañpani, ana nekira nomal re tai poli. Yo nene  
na pe yumā re na sanene poli, komin Ntewa na  
mava amio narin sipsip, yar la apa amlotun la e  
yo punu ga silaga. <sup>23</sup> A nomal naña e pulkumali  
nene naga mrae amio kupario pe tego re e poli,  
komin narin sipsip naga sane kana yomerarava  
nena, naurarena kienā ne Ntewa kila yo make  
ga asike ga e yemlagi silaga. <sup>24</sup> Purvanua tapēna  
lala yoko ayal e kana pupia yomerarava nena, a  
sur wo ya la naña pupia ñarin supe tapēna na  
purvanua lala aþar māga pe kiela, yoko awar  
van Yerusalem viu nene, sane kiela nalaena lala.  
<sup>25</sup> Yo nene yemalolo tapatete yoko imi e pogos  
tai, kila sanene pupia kana mratava ne lala kilia  
suwowo ga sumā silaga, <sup>26</sup> a naurarena a sur  
wo lala na purvanua tapēna lala yoko asumā  
aim lue ga loyumā e silaga. <sup>27</sup> Ana e lepas na

sur la naña pe mekik ruru re nena poli, yoko tañatete nena tai va loyumña e nene pogos tai, a yar ai naña kila yumñaena naña na mawaena pona na visokanena, yoko naga mëna ga tañatete va loyumña ea. La naña navaen loyumña, naga la ga naña kiela kia, narin sipsip siri sike loyumña e kienas Tus na Malena rui.

## 22

### *Purþes nen wii na malena*

<sup>1</sup> Siraunia, navisi kilologia purþes nen wii na malena pan inu. Nepisu kana wii wo nena, merarava na merarava, mlau siar e yo wa kienas ne Ntewa naña Narin Sipsip sike ea. <sup>2</sup> Kana wii ne mlau pano, kana yo naña mlau pa ea mlau nena pa likan pupia mrasha na pulkumali viu naña Yerusalem. Wii na malena nene mlau sanene pano, a purþes nen lak na malena lala asumal asike lepas luwoka. Laki la nene apo papisi, komin naña aþar mrasha e kupario make ga, yam lualima yam taaga pa lua [12] e kas taaga. A mäs mëna lala, apowo papisi, komin naña akilia akila ruru maiena kien yolai na purvanua make ga na yomarava.

<sup>3</sup> Sanene, yoko þelaga viowa la kienas ne Yermare na kila kareen sur make ga, yoko e pulkumali nene naga peraga narui. Narin sipsip sike e yo wa kienas ne Ntewa e yo nene, a pulen ga kienas yar lala naña kiela yumñaena, amlot lue ga e silaga. <sup>4</sup> Asike ga lavisinia, a asiri kienas kia sike e piamenala. <sup>5</sup> E yo nene, pe yemalolo re si poli, yo merarava make silaga, a pe yomerarava na

kap vivaga re tai poli, pona mrae. Peraga, Supē Ntewa ga pe purþes nen yomerarava naþa tegoli ruru ke yo nene, a naga þere kienā yeririna la naþani, pisir plan la ape þarin suþe na visuaren sur make ga.

### *Nawasuþeena kienā ne Yesu*

<sup>6</sup> Ana navisi naþa pis pan inu, sape “Sur la naþa opisuia pona omloge, ape lelaga paþisi, a yoko aim ave lelaga make nena napo. Kieta Supē keviu, naga Ntewa naþa navisawalena na sumo lala amiyumæ e kienā ninuna, naga pitetalia imimi kienā navisi lala mepim momalivin ko vena mekipian ko e sur la nene. Naga kila sanene komin naþa naga sinenan sape kienā yeririna lala monar akilia sur la naþa yoko ve ve piavi re aim amalivi.”

<sup>7</sup> A visena kienā ne Yesu e lele nene pa pan kienā yeririna lala sanini, sape “Avisuaria! Ve ve piavi re, neimin nomalivin amiu sina. Yar naþa tarar visena la nene märera, naþa apisawal sike e kiau tus wa nene, yoko wo van vaþisi, yoko naga loge wo vaþisi.”

### *Yoane pis maro*

<sup>8</sup> Inu naþa nepisu sur lala nene, nemloge visena la nene, inu yermarua Yoane. A pogos naþa nepisu make pae, nemloru nekinai e lana navisi naþa naga kipian inunia, nemloge sane sineun nesape nelotunia. <sup>9</sup> Ana naga pisaluþar inu, sape “Toko, ve okila re sanene. In mëna nepe yar na yumñaena kienā ne Ntewa ga, sanene ko omio womla la naþa navisawalena la nanua sumo, amio mëna yar taþena la naþa apuarar

ruru ke visena na tus wa la nene. Popon telotun kiesta Ntewa naga taaga ga.”

**10** A naga pisa m̄ena visen taþena pan inu, sape “Ve owarwan re navisawalena lala naþa sike e tus nene. Pog pimi ke lavis narui, popon yar la akilia ya naþa asum̄a apisa ke ne. **11** Yar naþa yepena ma yagogena, yoko kila kiena þelaga viowa va viowa laa sane, yoko kororaki na kiena mlamulen viowa lala va viowa ve keviu manene laa. Ana yar naþa loge, yoko kiena yum̄aena mesmes lala aimi awo vaþisi, yoko kiena þelaga wo lala aim ave wa ruru nenaga.”

**12** Visena kiena Yesu e lele nene, naga sanini, sape “Avisuaria! Nepimin ke naþa ve ve piavi re nenaga nom̄alivin amiu. Neimi nemio kiau nalaen wo lala naþa powo, naþa yoko nekian plan va yar lala taveve yum̄aena wo la naþa akila pan inu. **13** Inu þesia a inu maro, inu nasumo a inu nasirau, inu nisiarena a inu naluasia na sur make ga.

**14** “Ve ve piavi re, yoko pupia navisa ruruena imi m̄alivin ruru nena kiau yeririna lala. Apuvan ruru m̄ala kulsota lala, amiyowau ruru rui, ana akilia ava awarpo yo e pulutava vena ava loyum̄a e pulkumali wa kiena ne Ntewa, akilia ava atol purlaki na malena. **15** Ana yar taþena la mokliu naþa taþatete avam loyum̄a. Nane yar la naþa asum̄a apa kar ga sane lokul lala, amio la naþa aþar kimi, amio la naþa ataþa kolau amio lau, la naþa amem̄ar yaru, la naþa amlotun nono

lala, a la naña sinelan asape akila ūelaga lala na visokanena.

<sup>16</sup> “In na Yesu, nemligan navisi nene pimin vena visawal visena la nene van ko, vena okilia ova ola va kiau sumare make ga. Navisaarena naña apisaar asape molue kome lus kieno ne yermarua Parin Supe Tepet nanua, in ne nanini. In na nepe verue naña Melag, naña pisawal ke sape lavis yelagi imi warpoyo narui.”

<sup>17</sup> Ninuna ne Ntewa mloge visena nene, pisawal pa Yesu sape “Pogaga, okilia oimi!”

Sira naña na talopaena amio, sape “Ee, popon oim narui!”

A yar ai naña loge visena la nene, popon naga mēna visawalia, visave “Ake Yesu, visae oim ga rui!”

Yar naña loge moto karia, avietava vania vena kilia vam loyumña. Yar naña sinenan imiena, yoko naga kilia tol māna wii na malena, sa naña kieno nalaena tai naña pimi ga sa ga nene.

<sup>18</sup> Ana nevisa visena mārerera tai van amiu naña yoko aloe visena lala na visawalena lala na tus wa nene. Visae yar tai sukol si visen taþena tai to metavan naña sike pa rui, yoko Ntewa kila naga war naloge viowaena make ga naña tus nene pisa ke pa rui. <sup>19</sup> Pona visae yar tai lalua si visena laþas naña sike pa rui, yoko Ntewa lalua si lalimana vetania naña sike e purlaki na malena, yoko naga taþatete tol sur wo la sa naña tus wa nene sape asike loyumña e pulkumali wa.

<sup>20</sup> Naga naña pisawal visena la nene, pisape “Sa ke nene narui. Ve ve piavi re, yoko neim nomālivin amiu.”

A sitomena kiena ne yeririna kiena ne Ntewa lala, asape “Visae ve sa nene, wo vapisi. Awis Yesu, oim vilaga!”

<sup>21</sup> A visena maro na lepas na sunena na kiau m̄enieni, in yermarua Yoane nemlen nesape yoko lemamieni wo kiena kieta Sūe Yesu sike amio ami, kam yeririna lala kiena ne Ntewa.

Sanene.

**Lologena Wo Kienane Yesu Kristo Kome  
Kewo**

**The New Testament in the Lewo Language of Epi  
Island, Vanuatu**

**Le Nouveau Testament en Lewo langue de l'île d'Épi  
au Vanuatu — Niutestamen long Lewo lanwis, blong  
Epi Aelan, Vanuatu**

copyright © 2016 Wycliffe Bible Translators, Inc.

Language: Lewo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 11 Nov 2022 from source files dated 22 Nov 2019

ee028e1c-7e53-571d-8041-681daaf580e8